

漢

書

三
二



〔史四十二本柄百〕

宋景祐本漢書
三十二冊

翻刻必究

中華民國十九年八月初版

發行者

商務印書館

印刷者

上海寶山路
商務印書館

發行所

上海及各埠
商務印書館

王莽傳第六十九下

班固

漢書九十九下

祕書監護軍琅邪縣開國子顏

師古注

四年五月莽曰保成師友祭酒唐林故諫議祭酒

琅邪紀逡

師古曰逡音千旬反字或從彳其音同耳

孝弟忠恕敬上愛下博

通舊聞德行醇備至於黃髮靡有愆失

師古曰黃髮老稱謂

白髮盡落更生黃者

其封林爲建德侯逡爲封德侯位皆特進

見禮如三公

師古曰朝見之禮

賜第一區錢三百萬授几杖

焉六月更授諸侯茅土於明堂曰予制作地理建封

五等考之經藝合之傳記通於義理論之思之至

於再三自始建國之元以來九年于茲迺今定矣

予親設文石之平陳菁茅四色之土

師古曰尚書禹貢苞匭菁茅儒者

以爲菁菜名也茅三脊茅也而莽此言以菁茅爲一物則是謂善茅爲菁茅也土有五色而此云四者中央之土不以封也菁音精欽

告于岱宗泰社后土先祖妣以班授之

師古曰欽敬也班布也

各就厥國養牧民人用成功業其在綠邊若江南

非詔所召遣侍于帝城者納言掌貨大夫且調都

內故錢予其祿

師古曰調謂發取之音徒鈞反次下亦同

公歲八十萬侯伯

四十萬子男二十萬然復不能盡得莽好空言慕

古法多封爵人性實遴嗇

師古曰遴讀與吝同

託以地理未定

故且先賦茅土用慰喜封者是歲復明六筦之令

每一筦下爲設科條防禁犯者罪至死吏民抵罪

者浸衆又一切調上公以下諸有奴婢者率一口

出錢三千六百天下愈愁盜賊起納言馮常以六

筦諫莽大怒免常官置執法左右刺姦選用能吏

侯霸等分督六尉六隊師古曰督察也隊音遂如漢刺史與三

公士郡一人從事臨淮瓜田儀等爲盜賊依阻會

稽長州服虔曰姓瓜田名儀師古曰長州即枚乘所云長州之苑琅邪女子呂母亦起

初呂母子爲縣吏爲宰所冤殺師古曰宰縣令母散家財以

酤酒買兵弩師古曰酤音姑陰厚貧窮少年得百餘人遂攻

海曲縣殺其宰以祭子墓引兵入海其衆浸多後

皆萬數莽遣使者即赦盜賊還言盜賊解輒復合

問其故皆曰愁法禁煩苛不得舉手大作所得不

足以給貢稅閉門自守又坐鄰伍鑄錢挾銅姦吏

因以愁民民窮悉起爲盜賊莽大怒免之其或順

指言民驕黠當誅及言時運適然且減不久莽說

輒遷之師古曰說讀曰悅是歲八月莽親之南郊鑄作威斗

威斗者以五石銅爲之李奇曰以五色藥石及銅爲之蘇林曰以五色銅鑄治之師古曰李說是

也若今作鑰石之爲若北斗長二尺五寸欲以厭勝衆兵師古曰厭音一

葉反旣成令司命負之莽出在前入在御旁鑄斗日

大寒百官人馬有凍死者五年正月朔北軍南門

災以大司馬司允費興爲荊州牧見問到部方略

興對曰荆楊之民率依阻山澤以漁采爲業

師古曰漁

謂捕魚也采謂采取蘇果之屬

間者國張六筭稅山澤妨奪民之利連

年久旱百姓飢窮故爲盜賊興到部欲令明曉告

盜賊歸田里假貸犂牛種食

師古曰貸音土戴反

闊其租賦

師古

曰闊寬也

幾可以解釋安集

師古曰幾讀曰翼

莽怒免興官天下吏

以不得奉祿並爲姦利郡尹縣宰家累千金莽下

詔曰詳考始建國二年胡虜猾夏以來諸軍吏及

緣邊吏大夫以上爲姦利增產致富者收其家所

有財產五分之四以助邊急公府士馳傳天下考

覆貪饕餮

師古曰傳音張饕餮反饕餮音土高反

開吏告其將奴婢告其

主幾以禁茲

師古曰幾讀曰異

茲愈其皇孫功崇公宗坐自

畫容貌被服天子衣冠刻印三一日維祉冠存已

夏處南山臧薄冰

文穎曰祉福祚也冠存已欲龍袞代也應劭曰夏處南山就陰涼也臧薄冰亦以除暑也

二曰肅聖寶繼

應劭曰莽自謂承聖舜後能肅敬得天寶龜以立宗欲繼其緒

三曰德封

昌圖

蘇林曰宗自言以德見封當遂昌熾受天下圖籍

又宗舅呂寬家前徙合浦

私與宗通發覺按驗宗自殺莽曰宗屬為皇孫爵

為上公知寬等叛逆族類而與交通刻銅印三文

意甚害不知厭足窺欲非望春秋之義君親母將

將而誅焉

師古曰春秋公羊傳之辭也以公子牙將為殺逆而誅之故云然也親謂父母也

迷惑失道自

取此辜烏呼哀哉宗本名會宗以制作去二名今

復名會宗貶厥爵改厥號賜諡爲功崇繆伯以諸

伯之禮葬于故同穀城郡

師古曰同者宗所封一同之地

宗姊妨爲衛

將軍王興夫人祝詛姑殺婢以絕口事發覺莽使

中常侍帶是憚責問妨

師古曰帶是音帶又音徒蓋反

并以責興皆自殺

事連及司命孔仁妻亦自殺仁見莽免冠謝莽使尚書劾

仁乘乾車駕以馬左蒼龍右白虎前朱雀後玄武

右杖威節左負威斗號曰赤星非以驕仁廼以尊

新室之威命也仁擅免天文冠大不訖有詔勿劾

更易新冠其好怪如此

師古曰言莽性好爲鬼神怪異之事

以直道侯王

涉爲衛將軍涉者曲陽侯根子也根成帝世爲大

司馬薦莽自代莽恩之

師古曰懷其舊恩也

以爲曲陽非令稱

師古曰令善也曲陽之名非善稱也

乃追謚根曰直道讓公涉嗣其爵是

歲赤眉力子都樊崇等以飢饉相聚起於琅邪轉

鈔掠衆皆萬數遣使者發郡國兵擊之不能克六

年春莽見盜賊多乃令太史推三萬六千歲歷紀

六歲一改元布天下下書曰紫閣圖曰太一黃帝

皆僊上天

師古曰僊古仙字上外也

張樂崑崙虛山之上後世聖

主得瑞者當張樂秦終南山之上

服虔曰長安南山詩所謂終南故秦地故言秦也

予之不敏奉行未明乃今諭矣復以寧始將軍爲

更始將軍以順符命易不云乎日新之謂盛德生

生之謂易

李奇曰易道生諸當生者也師古曰下繫之辭體合變故曰日新

予其饗食哉欲以

誑燿百姓銷解盜賊衆皆笑之初獻新樂於明堂

大廟羣臣始冠麟韋之弁

李奇曰鹿皮冠

或聞其樂聲曰清

厲而哀非興國之聲也是時關東飢旱數年力子

都等黨衆寔多

師古曰寔漸也

更始將軍廉丹擊益州不

能克徵還更遣復位後大司馬護軍郭興庸部牧

李暉擊蠻夷若豆等太傅驎叔士孫喜清潔江

湖之盜賊而匈奴寇邊甚莽乃大募天下丁男及

死罪囚吏民奴名曰豬突豨勇以爲銳卒一切稅

天下吏民訾三十取一縑帛皆輸長安令公卿以

下至郡縣黃綬皆保養軍馬

師古曰保者言不許其有死失

多少各以

秩爲差又博募有奇技術可以攻匈奴者將待以不

次之位言便宜者以萬數或言能度水不用舟楫

師古曰楫所以刺舟也音集其字從木

連馬接騎濟百萬師或言不持斗

糧服食藥物三軍不飢或言能飛一日千里可窺

匈奴莽輒試之取大鳥翮爲兩翼

師古曰羽本曰翮音胡隔反

頭與

身皆著毛通引環紐飛數百步墮莽知其不可用

苟欲獲其名皆拜爲理軍賜以車馬待發初匈奴

右骨都侯須卜當其妻王昭君女也嘗內附莽遣

昭君兄子和親侯王歙誘呼當至塞下脅將詣長

安強立以爲須卜善于後安公

師古曰善于者匈奴之號也後安公者中國之爵兩加之

始欲誘迎當大司馬嚴尤諫曰當在匈奴右部兵

不侵邊單于動靜輒語中國此方面之大助也于今

迎當置長安橐街一胡人耳

師古曰橐街蠻夷館所在也解在陳湯傳橐音工早反

不如在匈奴有益莽不聽既得當欲遣尤與廉丹

擊匈奴皆賜姓徵氏號二徵將軍當誅單于輿而

立當代之

師古曰輿者時見爲單于之名

出車城西橫殿未發尤素

有智略非莽攻伐四夷數諫不從著古名將樂毅

白起不用之意及言邊事凡三篇奏以風諫莽

師古

曰風讀日諷

及當出延議尤固言匈奴可且以爲後先憂

山東盜賊莽大怒乃策尤曰視事四年蠻夷猾夏

不能遏絕寇賊茲究不能殄滅不畏天威不用詔

命兒很自臧持必不移

師古曰兒古貌字也兒很言其很戾見於容貌也臧善也自以爲善而固持其所見

不可移易懷執異心非沮軍議

師古曰沮壞也音材汝反

未忍致于理其

上大司馬武建伯印轂

師古曰轂者印之組

歸故郡以降符伯

董忠爲大司馬翼平連率田況奏郡縣言民不實

師古曰舉百姓貲財不以實數

莽復三十稅一以況忠言憂國進爵爲

伯賜錢二百萬衆庶皆言之青徐民多弃鄉里流

亡老弱死道路壯者入賊中夙夜連率韓博上言

有奇士長丈大十圍來至臣府曰欲奮擊胡虜自

謂巨母霸出於蓬萊東南五城西北昭如海瀕

師古曰昭

如海名也瀕涯也音頻又音賓

輶車不能載三馬不能勝即日以大車

四馬建虎旗載霸霸詔闕霸卧則枕鼓以鐵箸食此

皇天所以輔新室也願陛下作大甲高車賁育之

衣遣大將一人與虎賁百人迎之於道京師門戶

不容者開高大之以視百蠻

師古曰視音曰示

鎮安天下博

意欲以風莽

晉灼曰諷言母得篡盜而霸

莽聞惡之留霸在所新豐

師古曰在所謂其見到之處

更其姓曰巨母氏謂因文母太后而霸

王符也

師古曰莽字巨君若言文母出此人使我致霸王

徵博下獄以非所宜言弃

市明年改元曰地皇從三萬六千歲歷號也地皇

元年正月乙未赦天下下書曰方出軍行師敢有

趨謹犯法者輒論斬毋須時師古曰趨謹謂趨走而謹謹也須待也盡歲

止師古曰至此歲盡而止於是春夏斬人都市百姓震懼道路

以目二月壬申日正黑莽惡之下書曰廼者日中

見昧陰薄陽黑氣爲變百姓莫不驚怪兆域大將

軍王匡遣吏考問上變事者欲蔽上之明是以適

見于天師古曰適音適譴責也徒反見音胡電反以正于理塞大異焉莽見

四方盜賊多復欲厭之師古曰厭音一葉反又下書曰予之皇

初祖考黃帝定天下將兵爲上將軍建華蓋立斗

獻師古曰獻音犧謂斗魁及杓末如勺之形也內設大將外置大司馬五人

大將軍二十五人偏將軍百二十五人裨將軍千

二百五十人校尉萬二千五百人司馬三萬七千

五百人候十一萬二千五百人當百一十二萬五

千人晉灼曰當亦官名也師古曰當百官名百非其數士吏四十五萬人士千三

百五十萬人晉灼曰自五大司馬至此皆以五乘之也師古曰晉說非也從上計之或五或十或兩或三應協

於易弧矢之利以威天下師古曰易下繫辭曰弦木爲弧剡木爲矢弧矢之利以威天下言

所立將率以合此意木弓曰弧予受符命之文稽前人將條備焉師古

曰稽考也考法於前人也於是置前後左右中大司馬之位賜諸

州牧號爲大將軍郡卒正連帥大尹爲偏將軍屬

令長裨將軍縣宰爲校尉乘傳使者經歷郡國日

且十輩

師古曰傳音張戀反次下亦同

倉無見穀

師古曰見謂見在也

以給傳車

馬不能足賦取道中車馬

師古曰於道中行者即執取之以充事也

取辦於

民七月大風毀王路堂復下書曰乃壬午舖時有

列風雷雨發屋折木之變

師古曰列風列暴之風

予甚弁焉予

甚栗焉予甚恐焉

師古曰弁疾也一曰弁撫手也言驚懼也

伏念一句迷廼解

矣

師古曰先言列風雷雨後言迷廼解矣蓋取舜納于大麓列風雷雨不迷以爲言也

昔符命文立安

爲新遷王

服虔曰安莽第三子也遷音仙莽改汝南新蔡曰新遷師古曰遷猶僂耳不勞假借音

臨國雒

陽爲統義陽王是時予在攝假謙不敢當而以爲公

其後金匱文至議者皆曰臨國雒陽爲統謂據土

中爲新室統也宜爲皇太子自此後臨久病雖瘳

不平朝見挈茵輿行

服虔曰有疾以執茵輿之行也晉灼曰漢儀注皇后婕妤乘輦餘者以茵四

人舉以行豈今之板輿而鋪茵乎師古曰晉說非也此直謂坐茵褥之上而令四人對舉茵之四角輿而行何謂板輿乎

見王

路堂者張於西廂及後閣更衣中

李奇曰張帳也晉灼曰更衣中謂朝賀易衣服處

室屋名也

又以皇后被疾臨且去本就舍妃妾在東永巷

師古曰言臨侍疾故去其本所居而來就此止息是以妃妾在東永巷也

壬午列風毀王路西廂

及後閣更衣中室昭寧堂池東南榆樹大十圍東

僵擊東閣閣即東永巷之西垣也皆破折瓦壞發

屋拔木予甚驚焉又候官奏月犯心前星厥有占

予甚憂之伏念紫閣圖文太一黃帝皆得瑞以僊

後世壞主當登終南山

李奇曰壞主大主也

所謂新遷王者乃

太一新遷之後也

服虔曰太一黃帝欲令安追繼其後也

統義陽王乃用

五統以禮義登陽上遷之後也臨有兄而稱太子

名不正宣尼公曰名不正則言不順至於刑罰不

中民無所錯手足

師古曰論語載孔子對子路之言錯安置也音千故反莽追謚孔子為褒成宣尼公惟即

位以來陰陽未和風雨不時數遇枯旱蝗螟為災

穀稼鮮耗百姓苦飢

師古曰鮮少也耗虛也鮮音先踐反耗音火到反

蠻夷猾夏

寇賊姦宄人民正營無所錯手足

師古曰正營惶恐不安之意正音征

厥咎在名不正焉其立安為新遷王臨為統義陽

王幾以保全二子

師古曰幾讀曰冀

子孫千億外攘四夷內

安中國焉是月社陵便殿乘輿虎文衣廢臧在室

匣中者

師古曰匣
匱也音狎

出自樹立外堂上

師古曰
樹豎也

良父乃委

地吏卒見者以聞莽惡之下書曰寶黃廝赤

服虔曰
以黃爲

寶自用其行氣也廝赤廝
役賤者皆衣赤賤漢行也

其令郎從官皆衣絳望氣爲

數者多言有土功象莽又見四方盜賊多欲視爲

自安能建萬世之基者

師古曰
視音示

乃下書曰予受命遭

陽九之厄百六之會府帑空虛百姓匱乏宗廟未

脩且祫祭於明堂太廟夙夜永念非敢寧息深惟

吉昌莫良於今年予乃卜波水之北郎池之南惟

玉食

劉德曰長安南也晉灼曰黃圖波浪永名也在甘泉苑中師古曰
晉說非也黃圖有西波池郎池皆在石城南上林中玉食謂龜

爲玉兆之文而墨
食也波音彼皮反

予又卜金水之南明堂之西亦惟玉

食子將親築焉於是遂營長安城南

師古曰蓋所謂金水之南明堂之西

提封百頃九月甲申莽立載行視

師古曰立載謂立而乘車也行音下更反

親舉築三下司徒王尋大司空王邑持節及侍中

常侍執法杜林等數十人將作

師古曰將領築作之人

崔發張

邯說莽曰德盛者文縟

師古曰文禮文也縟繁也音辱

宜崇其制度

宣視海內

師古曰視讀曰示

且令萬世之後無以復加也莽

乃博徵天下工匠諸圖畫以望法度筭及吏民以

義入錢穀助作者駱驛道路

師古曰駱驛言不絕

壞徹城西苑

中建章承光包陽大臺儲元宮及平樂當路陽祿

館凡十餘所

師古曰自建章以下至陽祿皆上林苑中館

取其材瓦以起九

廟是月大雨六十餘日令民入米六百斛爲郎其

郎吏增秩賜爵至附城九廟一曰黃帝太初祖廟

二曰帝虞始祖昭廟三曰陳胡王統祖穆廟四曰

齊敬王世祖昭廟五曰濟北愍王王祖穆廟凡五

廟不墮云師古曰墮毀也音火規反六曰濟南伯王尊禰昭廟七

曰元城孺王尊禰穆廟八曰陽平頃王戚禰昭廟

九曰新都顯王戚禰穆廟殿皆重屋太初祖廟東

西南北各四十丈高十七丈餘廟半之爲銅薄櫨

師古曰薄櫨柱上枅即今所謂指也櫨音盧飾以金銀琱文師古曰琱字與彫同窮極百工

之巧帶高增下師古曰本因高地而建云之其旁下者更增築功費數百鉅萬卒

徒死者萬數鉅鹿男子馬適求等謀舉燕趙兵以

誅莽

師古曰馬適姓也求名也

大司空士王丹發覺以聞莽遣三

公大夫逮治黨與

師古曰逮逮捕之也已解於上

連及郡國豪傑數

千人皆誅死封丹爲輔國侯白莽爲不順時令百

姓怨恨莽猶安之又下書曰惟設此壹切之法以

來常安六鄉巨邑之都枹鼓稀鳴盜賊衰少

師古曰巨大也

枹所以擊鼓者也音浮其字從木

百姓安土歲以有年此乃立權之

力也今胡虜未滅誅蠻獫狁未絕焚江湖海澤麻沸

盜賊未盡破殄

師古曰麻沸言如亂麻而沸涌

又興奉宗廟社稷之

大作民衆動搖今復壹切行此令盡二年止之以

全元元救愚姦是歲罷大小錢更行貨布長二寸

五分廣一寸直貨錢二十五貨錢徑一寸重五銖

枚直一兩品並行敢盜鑄錢及偏行布貨伍人知

不發舉皆沒入爲官奴婢

師古曰伍人同伍之人若今伍保者也

太傅平晏

死以予虞唐尊爲太傅尊曰國虛民貧咎在奢泰

乃身短衣小褻乘牡馬柴車

師古曰柴車即棧車

藉橐瓦器

師古

曰藉橐去蒲蒻也瓦器以瓦爲食器

又以歷遺公卿

師古曰以瓦器盛食遺公卿也

出見男

女不異路者尊自下車以象刑赭幘汚染其衣

師古

曰赭幘以赭汁漬中幘

莽聞而說之

師古曰說讀曰悅

下詔申敕公卿思

與厥齊

師古曰令與尊同此操行也論語稱孔子曰見賢思齊故莽云然

封尊爲平化侯

是時南郡張霸江夏羊牧王匡等起雲杜綠林號

曰下江兵

晉灼曰本起江夏雲杜縣後分西上入南郡屯藍口故號下江兵也

衆皆萬餘人武

功中水鄉民三舍墊爲池

師古曰墊陷也音丁念反

二年正月以

州牧位三公刺舉急解

師古曰解讀曰解

更置牧監副秩

元士冠法冠行事如漢刺史是月莽妻死謚曰孝

睦皇后葬渭陵長壽園西令永侍文母名陵曰億

年初莽妻以莽數殺其子涕泣失明莽令太子臨

居中養焉莽妻旁侍者原碧莽幸之後臨亦通焉

恐事泄謀共殺莽臨妻愜國師公女

師古曰愜音一尋反

能爲

星語臨官中且有白衣會臨喜以爲所謀且成後

貶爲統義陽王出在外第愈憂恐會葬妻病困臨

予書曰上於子孫至嚴前長孫中孫年俱三十而

死

師古曰中讀曰仲

今臣臨復適三十誠恐一旦不保中室則

不知死命所在

李奇曰中室臨之母也晉灼曰長樂宮中殿也師古曰二說皆非也中室室中也臨自言欲於室中自保全

不可得耳莽候妻疾見其書大怒疑臨有惡意不令得

會喪既葬收原碧等考問具服姦謀殺狀莽欲祕

之使殺案事使者司命從事埋獄中家不知所在

賜臨藥臨不肯飲自刺死使侍中票騎將軍同說

侯林賜薨衣輿載

師古曰說讀曰悅

策書曰符命文立臨爲

統義陽王此言新室即位三萬六千歲後爲臨之

後者乃當龍陽而起前過聽議者以臨爲太子有
列風之變輒順符命立爲統義陽王在此之前自
此之後不作信順弗蒙厥佑天年隕命嗚呼哀哉
迹行賜諡諡曰繆王又詔國師公臨本不知星事
從愔起愔亦自殺是月新遷王安病死初莽爲侯
就國時幸侍者增秩懷能開明懷能生男興增秩
生男匡女皐開明生女捷皆留新都國以其不明
故也

師古曰言侍者或與外人私通所生子女不可分明也

及安疾甚莽自病無子爲

安作奏使上言興等母雖微賤屬猶皇子不可以

弃章視羣公

師古曰視讀曰示以所上之章徧示之

皆曰安友于兄弟

師古

曰友愛也善兄弟曰友

宜及春夏加封爵於是以王車遣使者

迎興等封興爲功脩公匡爲功建公畢爲睦脩任捷爲睦逮任孫公明公壽病死旬月四喪焉莽壞漢孝武孝昭廟分葬子孫其中魏成大尹李焉與卜者王況謀況謂焉曰新室即位以來民田奴婢不得賣買數改錢貨徵發煩數軍旅騷動四夷竝侵百姓怨恨盜賊竝起漢家當復興君姓李李者徵徵火也師古曰徵音竹里反當爲漢輔因爲焉作讖書言文帝發忿居地下趣軍北告匈奴南告越人師古曰趣讀曰促江中劉信執敵報怨復續古先四年當發軍江湖

有盜自稱樊王姓爲劉氏萬人成行

師古曰行音胡浪反

不受赦

令欲動秦雒陽十一年當相攻太白楊光歲星入

東井其號當行

師古曰號謂號令也

又言莽大臣吉凶各有日

期會合十餘萬言焉令吏寫其書吏亡告之莽遣

使者即捕焉獄治皆死三輔盜賊麻起

師古曰言起者如亂麻也

乃置捕盜都尉官令執法謁者追擊長安中建鳴

鼓攻賊幡而使者隨其後遣太師犧仲景尚更始

將軍護軍王黨將兵擊青徐國師和仲曹放助郭

興擊句町轉天下穀幣詣西河五原朔方漁陽每

一郡以百萬數欲以擊匈奴秋隕霜殺菽關東大

飢蝗民犯鑄錢伍人相坐沒入爲官奴婢其男子

檻車兒女子步以鐵瑣琅當其頸傳詎鍾官以十

萬數師古曰琅當長鑲也鍾官鑄錢之官也到者易其夫婦師古曰改相配也愁

苦死者什六七孫喜景尚曹放等擊賊不能克軍

師放縱百姓重困師古曰重音直用反莽以王況讖言荆楚當

興李氏爲輔欲厭之師古曰厭音一葉反廼拜侍中掌牧大夫

李參爲大將軍楊州牧賜名聖師古曰改其舊名以聖代讖莽音所林反使

將兵奮擊上谷諸夏自請願說瓜田儀服虔曰儲夏人姓也莽

以爲中郎使出儀師古曰說之今自出儀文降未出而死師古曰上文書

言降而身未出莽求其尸葬之爲起家祠室謚曰瓜寧殤

男幾以招來其餘

師古曰幾讀曰翼

然無肯降者閏月丙辰

大赦天下天下大服民私服在詔書前亦釋除

張晏

曰莽妻本以此歲死天下大服也私服自喪其親皆除之

郎陽成脩獻符命言繼立民

母又曰黃帝以百二十女致神僊莽於是遣中散

大夫謁者各四十五人分行天下

師古曰行音下更反

博采鄉

里所高有淑女者上名莽夢長樂宮銅人五枚起

立莽惡之念銅人銘有皇帝初兼天下之文即使

尚方工鑄滅所夢銅人膺文

師古曰鑄鑿也音子全反

又感漢高

廟神靈

師古曰謂夢見謹責

遣虎賁武士入高廟拔劔四面提

擊

師古曰提擲也音徒計反

斧壞戶牖

師古曰以斧斲壞之

桃湯赭鞭鞭灑屋

鉞

師古曰挑湯麗之赭鞭鞭之也赭赤也

令輕車校尉居其中又令中軍

北壘居高寢

師古曰徙此軍壘之兵士於高廟寢中也居也

或言黃帝時建華

蓋以登僊莽乃造華蓋九重高八丈一尺金瑤羽

葆

師古曰瑤讀曰爪謂蓋弓頭爲爪形

載以祕機四輪車

服虔曰蓋高八丈其杠皆有屈膝可上下

屈申也師古曰言潛爲機關不使外見故曰祕機也

駕六馬力士三百人黃衣憤

車上人擊鼓輓者皆呼登僊莽出令在前百官竊

言此似輜車非僊物也

師古曰輜車載喪車音而

是歲南郡秦豐衆

且萬人平原女子遲昭平能說經博以八投

服虔曰博弄經

以八投前授之

亦聚數千人在河阻中莽召問羣臣禽賊方

略皆曰此天囚行尸命在漏刻故左將軍公孫祿

徵來與議

師古曰與讀曰豫

祿曰太史令宗宣典星歷候氣

變以凶為吉亂天文誤朝廷太博平化侯飾虛僞

以媮名位賊夫人之子

師古曰論語稱子路使子羔為費宰孔子曰賊夫人之子言羔未知政道

而使宰邑所以為賊害也故祿引此而言國師嘉信公顛倒五經毀師法令

學士疑惑明學男張邯地理侯孫陽造井田使民

弃土業犧和魯匡設六筦以窮工商說符侯崔發

阿諛取容令下情不上通宜誅此數子以慰天下

又言匈奴不可攻當與和親臣恐新室憂不在匈

奴而在封域之中也莽怒使虎賁扶祿出然頗采

其言左遷魯匡為五原卒正以百姓怨非故六筦

非臣所獨造莽厭衆意而出之

師古曰厭滿也音一豔反

初四方皆

以飢寒窮愁起爲盜賊稍稍羣聚常思歲熟得

歸鄉里衆雖萬數亶稱巨人從事三老祭酒

師古

曰亶讀曰但言不爲大號

不敢略有城邑轉掠求食日闕而已

師古

曰闕盡也隨日而盡也闕音空穴反

諸長吏牧守皆自亂鬪中兵而死

師古

日中

賊非敢欲殺之也而莽終不諭其故

師古曰不曉此意也

是

歲大司馬士按章豫州

師古曰有上章相告者就而按治之

爲賊所獲賊

送付縣士還上書具言狀莽大怒下獄以爲誣罔

因下書責七公曰夫吏者理也宣德明恩以牧養

民仁之道也抑強督姦捕誅盜賊義之節也

師古曰督

謂察視也

今則不然盜發不輒得至成羣黨遮略乘傳

宰士

師古曰傳音張戀反

士得脫者又妄自言我責數賊何故

爲是

師古曰數音所具反

賊曰以貧窮故耳賊護出我今俗人

議者率多若此惟貧困飢寒犯法爲非大者羣盜

小者偷穴不過二科

師古曰穴謂穿牆爲盜也

今乃結謀連黨以

千百數是逆亂之大者豈飢寒之謂邪七公其嚴

敕卿大夫卒正連率庶尹謹牧養善民急捕殄盜

賊有不同心并力疾惡黜賊而妄曰飢寒所爲輒

捕繫請其罪於是羣下愈恐莫敢言賊情者亦不

得擅發兵賊由是遂不制唯翼平連率田況素果

敢發民年十八以上四萬餘人授以庫兵與刻石

爲約赤糜聞之不敢入界

師古曰糜眉也以朱塗眉故曰赤眉古字通用

況自効

奏莽讓況

師古曰讓責也

未賜虎符而擅發兵此弄兵也

厥臯之興

師古曰擅發之罪與之軍興同科也

以況自詭必禽滅賊故

且勿治

師古曰詭責也自以爲憂責

後況自請出界擊賊所向皆破

莽以璽書令況領青徐二州牧事況上言盜賊始

發其原甚微非部吏伍人所能禽也咎在長吏不

爲意縣欺其郡郡欺朝廷實百言十實千言百朝

廷忽略不輒督責遂至延曼連州

師古曰延音弋戰反曼與蔓同

乃遣

將率多發使者傳相監趣

師古曰趣讀曰促

郡縣力事上官

應塞詰對

師古曰力勤也塞當也

共酒食具資用以救斷斬師古曰

曰交懼斬死之刑也共讀曰供

不給復憂盜賊治官事

師古曰給暇也

將率又不

能躬率吏士戰則爲賊所破吏氣寔傷徒費百姓

師古曰寔也

前幸蒙赦令賊欲解散或反遮擊恐入山谷

轉相告語故郡縣降賊皆更驚駭恐見詐滅因飢

饉易動旬日之間更十餘萬人此盜賊所以多之

故也今雒陽以東米石二千竊見詔書欲遣太師

更始將軍二人爪牙重臣多從人衆道上空竭少

則亡以威視遠方

師古曰視讀曰示

宜急選牧尹以下明其

賞罰收合離鄉小國無城郭者徙其老弱置大城

中積臧穀食并力固守賊來攻城則不能下所過
無食執不得羣聚如此招之必降擊之則滅今空
復多出將率郡縣苦之反甚於賊宜盡徵還乘傳
諸使者以休息郡縣委任臣況以二州盜賊必平
定之莽畏惡況陰爲發代遣使者賜況璽書使者
至見況因令代監其兵況隨使者西到拜爲師尉
大夫況去齊地遂敗三年正月九廟蓋構成納神
主莽謁見大駕乘六馬以五采毛爲龍文衣著角
長三尺師古曰以被馬上也華蓋車元戎十乘在前因賜治廟
者司徒大司空錢各千萬侍中中常侍以下皆封

封都匠仇延爲邯鄲里附城

師古曰都匠大匠也邯音胡二敢反淡音大敢反豐盛之意

月霸橋災數千人以水沃救不滅莽惡之下書曰

夫三皇象春五帝象夏三王象秋五伯象冬皇王

德運也伯者繼空續乏以成歷數故其道駁

師古曰伯皆讀

霸曰惟常安御道多以所近爲名廼二月癸巳之夜甲

午之辰火燒霸橋從東方西行至甲午夕橋盡火

滅大司空行視考問

師古曰行音下更反

或云寒民舍居橋下

師古曰舍止宿也

疑以火自燎爲此災也

師古曰燎謂炙令燥也

其明旦

即乙未立春之日也予以神明聖祖黃虞遺統受

命至于地皇四年爲十五年正以三年終冬絕滅

霸駁之橋欲以興成新室統壹長存之道也又戒

此橋空東方之道今東方歲荒民飢道路不通東

岳太師亟科條

師古曰亟急也音己力反

開東方諸倉賑貸窮乏

以施仁道其更名霸館爲長存館霸橋爲長存橋

是月赤眉殺太師犧仲景尚關東人相食四月遣

太師王匡更始將軍廉丹東

師古曰東謂東出也

祖都門外

古師

曰祖道送匡丹於都門外

天大雨霑衣止長老嘆曰是爲泣軍莽

曰惟陽九之院與害氣會究于去年枯旱霜蝗飢饉

薦臻

師古曰薦讀曰荐荐仍也

百姓困乏流離道路於春尤甚予

甚悼之今使東岳太師特進褒新侯開東方諸倉

賑貸窮乏太師公所不過道分遣大夫謁者並開

諸倉以全元元太師公因與廉丹大使五威司命

位右大司馬更始將軍平均侯之兗州填撫所掌

師古曰之往也
填音竹刃反及青徐故不軌盜賊未盡解散後復屯

聚者皆清潔之期於安兆黎矣師古曰
黎衆也太師更始合

將銳士十餘萬人所過放縱東方爲之語曰寧逢

赤眉不逢太師太師尚可更始殺我卒如田況之

言莽又多遣大夫謁者分教民煮草木爲酪酪不

可食重爲煩費師古曰重
音直用反莽下書曰惟民困乏雖溥

開諸倉以賑贍之師古曰溥
與普同猶恐未足其且開天下

山澤之防諸能采取山澤之物而順月令者其恣

聽之勿令出稅至地皇三十年如故是王光上戊

之六年也孟康曰戊土也莽所作歷名如令豪吏猾民辜而擯之小

民弗蒙非予意也師古曰辜擯謂獨專其利而令它人犯者得罪辜也易不云虐

損上益下民說無疆師古曰益卦彖辭也言損上以益下則人皆歡悅無窮竟書云言

之不從是謂不艾師古曰洪範之言艾讀曰又久治也咨虘羣公可不憂

哉師古曰咨者嘆息之言是時下江兵盛新市朱鮪平林陳牧

等皆復聚衆攻擊鄉聚莽遣司命大將軍孔仁部

豫州納言大將軍嚴尤秩宗大將軍陳茂擊荊州

各從吏士百餘人乘舩從渭入河至華陰迺出乘

傳到部募士尤謂茂曰遣將不與兵符必先請而

後動是猶紕韓盧而責之獲也

師古曰紕繫也韓盧古韓國之名犬也黑色曰盧

夏蝗從東方來蜚蔽天

師古曰蜚古飛字也

至長安入未央宮

緣殿閣莽發吏民設購賞捕擊手莽以天下穀貴欲

厭之

師古曰厭音一葉反

爲大倉置衛交戟名曰政始掖門流

民入關者數十萬人廼置養贍官稟食之

師古曰稟給也食讀曰飢

使者監領與小吏共盜其稟飢死者十七八先是

莽使中黃門王業領長安市買賤取於民民甚患

之業以省費爲功賜爵附城莽聞城中飢饉以問

業業曰皆流民也乃市所賣梁飴肉羹持入視莽

師古曰視讀曰示

曰居民食咸如此莽信之冬無鹽索盧恢

等舉兵反城

師古曰索盧姓也恢名也反城據城以反也

廉丹

王匡攻拔之斬首萬餘級莽遣中郎將奉璽書勞

丹匡進爵爲公封吏士有功者十餘人赤眉別校

董憲等衆數萬人在梁郡王匡欲進擊之廉丹以

爲新拔城罷勞

師古曰罷讀曰疲

當且休士養威匡不聽引

兵獨進丹隨之合戰成昌

師古曰成昌地名也

兵敗匡走丹使

吏持其印轂節付匡曰小兒可走吾不可遂止戰

死校尉汝雲王隆等二十餘人別鬪聞之皆曰廉

公已死吾誰爲生馳犇賊皆戰死

師古曰犇古奔字也

莽傷之

下書曰惟公多擁選士精兵衆郡駿馬倉穀帑藏

皆得自調

師古曰謂發取也音徒釣反

忽於詔策離其威節騎馬

呵譟

師古曰忽謂急也譟羣呼也音先到反

爲狂刃所害烏呼哀哉賜諡

曰果公國將哀章謂莽曰皇祖考黃帝之時中黃

直爲將破殺蚩尤今臣居中黃直之位願平山東

莽遣章馳東與太師匡并力又遣大將軍陽浚守

教倉司徒王尋將十餘萬屯雒陽填南宮

師古曰填音竹刃反

大司馬董忠養士習射中軍北壘大司空王邑兼

三公之職司徒尋初發長安宿霸昌殿

師古曰霸昌觀之殿也三

輔黃圖曰在城外也

亡其黃鉞尋士房楊素狂直廼哭曰此經

所謂喪其齊斧者也

應劭曰齊利也亡其利斧言無以復斷斬也師古曰此易巽卦上九爻辭

自効去莽擊殺揚四方盜賊往往數萬人攻城邑殺二千石以下太師王匡等戰數不利莽知天下潰畔事窮計迫廼議遣風俗大夫司國憲等分行

天下

師古曰行音下更反

除井田奴婢山澤六筭之禁即位以

來詔今不便於民者皆收還之待見未發會世祖與兄齊武王伯升宛人李通等

師古曰世祖謂光武皇帝

帥舂陵

子弟數千人招致新市平林朱鮪陳牧等合攻拔棘陽是時嚴尤陳茂破下江兵成丹王常等數千人別走入南陽界十一月有星孛于張東南行五

日不見莽數召問太史令宗宣諸術數家皆繆對
言天文安善羣賊且滅莽差以自安四年正月漢
兵得下江王常等以爲助兵擊前隊大夫甄阜屬
正梁丘賜皆斬之殺其衆數萬人初京師聞青徐
賊衆數十萬人訖無文號旌旗表識師古曰文謂文章
號謂大位號也一咸怪異之好事者竊言此豈如古

曰號謂號令也識讀
與幟同音式志反

三皇無文書號謚邪

師古曰欲其事
成故云然也

莽亦心怪以問

羣臣羣臣莫對唯嚴尤曰此不足怪也自黃帝湯
武行師必待部曲旌旗號令今此無有者直飢寒
羣盜犬羊相聚不知爲之耳莽大說

師古曰說
讀曰悅

羣臣

盡服及後漢兵劉伯升起皆稱將軍攻城略地既

殺甄卓移書稱說莽聞之憂懼漢兵乘勝遂圍宛

城初世祖族兄聖公先在平林兵中三月辛巳朔

平林新市下江兵將王常朱鮪等共立聖公爲帝

改年爲更始元年拜置百官莽聞之愈恐欲外視

自安

師古曰視
讀曰示

廼除其須髮進所徵天下淑女杜陵

史氏女爲皇后聘黃金三萬斤車馬奴婢雜帛珍

寶以巨萬計莽親迎於前殿兩階間成同牢之禮

于上西堂備和嬪美御和人三位視公嬪人九視卿

美人二十七視大夫御人八十一視元士凡百二

十人皆侑印韞執弓韞

師古曰禮記月令仲春之月玄鳥至之日以太牢祠于高禘天子親往后

妃率九嬪御乃禮天子所御帶以弓韞授以弓矢于高禘之封皇

前韞弓衣也帶之者求男子之祥也故莽依放之焉韞音獨封皇

后父謀爲和平侯拜爲寧始將軍謀子二人皆侍

中是日大風發屋折木羣臣上壽曰迺庚子雨水

灑道辛丑清靚無塵

師古曰靚即靜字也

其夕穀風迅疾從東

北來

師古曰穀風即谷風

辛丑巽之官日也巽爲風爲順后誼

明母道得溫和慈惠之化也易曰受茲介福于其

王母

師古曰晉卦六二爻也介大也王母君母

禮曰承天之慶萬福無疆

師古曰蕃滋元元驩喜兆

矣百穀豐茂庶草蕃殖

師古曰蕃滋也殖生也

元元驩喜兆

民賴福天下幸甚某日與方士涿郡昭君等於後

宮考驗方術縱淫樂焉大赦天下然猶曰故漢氏

春陵侯羣子劉伯升與其族人婚姻黨與妄誅言

惑衆悖畔天命及手害更始將軍廉丹前隊大夫

甄卓屬正梁丘賜及北狄胡虜逆與泊南棘虜若

豆孟遷不用此書師古曰輿匈奴單于名也泊及也若豆孟遷蠻

也限有能捕得此人者皆封爲上公食邑萬戶賜寶

貨五千萬又詔大師王匡國將哀章司命孔仁充

州牧壽良卒正王閔楊州牧李聖亟進所部州郡

兵師古曰亟急也凡三十萬衆迫措青徐盜賊師古曰措讀與笮同音莊客反下亦放此

納言將軍嚴尤秩宗將軍陳茂車馬將軍王巡左

隊大夫王吳亟進所部州郡兵凡十萬衆迫措前

隊醜虜明告以生活丹青之信師古曰生活謂來降者不殺之也丹青之信言明著也

復迷惑不解散皆并力合擊殄滅之矣大司空隆

新公宗室戚屬前以虎牙將軍東指則反虜破壞

西擊則逆賊靡碎師古曰靡散也音武皮反此廼新室威寶之臣

也如黠賊不解散將遣大司空將百萬之師征伐

剿絕之矣師古曰剿截也音子小反遣七公幹士隗囂等七十二

人分下赦令曉諭云囂等旣出因逃亡矣四月世祖

與王常等別攻潁川下昆陽鄧定陵師古曰三縣之名也鄧音一扇反

莽聞之愈恐遣大司空王邑馳傳至雒陽

師古曰傳音張戀反

與司徒王尋發衆郡兵百萬號曰虎牙五威兵平

定山東得顓封爵政決於邑除用徵諸明兵法六

十三家術者各持圖書受器械備軍吏傾府庫以

遣邑多齎珍寶猛獸欲視饒富用怖山東

師古曰視讀曰示

邑至雒陽州郡各選精兵牧守自將定會者四十

二萬人餘在道不絕車甲士馬之盛自古出師未

嘗有也六月邑與司徒尋發雒陽欲至宛道出潁

川過昆陽昆陽時已降漢漢兵守之嚴尤陳茂與

二公會二公縱兵圍昆陽嚴尤曰稱尊號者在宛

下宜亟進

師古曰亟急也

彼破諸城自定矣邑曰百萬之師

所過當滅今屠此城喋血而進

師古曰喋音牒

前歌後舞顧

不快邪遂圍城數十重城中請降不許嚴尤又曰

歸師勿遏圍城爲之闕

師古曰此兵法之言也遏遮也闕不合也

可如兵法

使得逸出以怖宛下邑又不聽會世祖悉發鄴定

陵兵數千人來救昆陽尋邑易之

師古曰輕易之也易音示豉反

自將

萬餘人行陳

師古曰巡行軍陳也行音下更反

敕諸營皆按部毋得動

獨迎與漢兵戰不利大軍不敢擅相救漢兵乘勝

殺尋昆陽中兵出並戰邑走軍亂天風蜚瓦

師古曰蜚古飛字

雨如注水大衆崩壞號譟

師古曰譟音火故反

虎豹股栗

師古曰言戰懼甚

士卒奔走各還歸其郡邑獨與所將長安勇敢數千人還雒陽關中聞之震恐盜賊並起又聞漢兵言莽鳩殺孝平帝莽廼會公卿以下於王路堂開所爲平帝請命金縢之策泣以視羣臣

師古曰視讀曰示

命明

學男張邯稱說其德及符命事因曰易言伏戎于

莽升其高陵三歲不興

師古曰同人卦九三爻辭也莽平草也言伏兵戒於草莽之中升高陵而望

不敢前進至于三歲不能起也

莽皇帝之名升謂劉伯升高陵謂高

陵侯子翟義也言劉升翟義爲伏戎之兵於新皇

帝世猶殄滅不興也羣臣皆稱萬歲又令東方檻

車傳送數人言劉伯升等皆行大戮民知其詐也

先是衛將軍王涉素養道士西門君惠君惠好天

文識記爲涉言星孛掃宮室劉氏當復興國師公

姓名是也涉信其言以語大司馬董忠數俱至國

師殿中廬道語星宿師古曰廬者宿止之處道謂說之也國師不應後

涉特往對歌涕泣言誠欲與公共安宗族師古曰誠實也柰

何不信涉也歌因爲言天文人事東方必成涉曰

新都哀侯小被病功顯君素耆酒師古曰耆讀曰嗜疑帝本

非我家子也如淳曰言莽母洛薄嗜酒淫逸得莽耳非王氏子也設此詐欲以自別不受誅也董公

主中軍精兵涉領宮衛伊休侯主殿中如同心合謀

共劫持帝東降南陽天子可以全宗族不者俱夷

滅矣伊休侯者歆長子也爲侍中五官中郎將莽
素愛之歆怨莽殺其三子又畏大禍至遂與涉忠
謀欲發歆曰當待太白星出廼可忠以司中大贅
起武侯孫伋亦主兵復與伋謀伋歸家顏色變不
能食妻怪問之語其狀妻以告弟雲陽陳邯邯欲
告之七月伋與邯俱告莽遣使者分召忠等時忠方
講兵都肄師古曰肄習也大習兵也肄音示二反護軍王咸謂忠謀久不

發恐漏泄不如遂斬使者勒兵入忠不聽遂與歆
涉會省戶下莽令豐憚責問皆服中黃門各拔刃將
忠等送廬忠拔劍欲自刎待中王望傳言大司馬

反黃門持劍共格殺之省中相驚傳勒兵至郎署

皆拔刃張弩更始將軍史湛行諸署

師古曰行音下更反

告郎

吏曰大司馬有狂病發已誅皆令弛兵

師古曰弛放也

莽欲

以厭凶

師古曰厭當也音一葉反

使虎賁以斬馬劍挫忠

師古曰挫讀曰劉音千郎

反盛以竹器傳曰反虜出下書赦大司馬官屬吏

士爲忠所誅誤謀反未發覺者收忠宗族以醇醢

毒藥尺白刃叢棘并一坎而埋之劉歆王涉皆自

殺莽以二人骨肉舊臣惡其內潰

師古曰王涉骨故隱肉也劉歆舊臣

其誅伊休侯疊又以素謹歆訖不告

師古曰訖猶竟也歆竟不以所謀告

之但免侍中中郎將更爲中散大夫後日殿中鉤

盾土山僊人掌旁有白頭公青衣

鄭氏曰僊人以掌承承露盤也郎

吏見者私謂之國師公衍功侯喜素善卦莽使筮

之曰憂兵火莽曰小兒安得此左道是廼予之皇

祖叔父子僑欲來迎我也莽軍師外破大臣內畔

左右亡所信不能復遠念郡國欲諄邑與計議師古

曰諄古呼字崔發曰邑素小心今失大衆而徵恐其執

節引決宜有以大慰其意於是莽遣發馳傳諭邑

師古曰謂諭告之傳音張戀反

我年老母適子

師古曰適讀曰嫡

欲傳邑以天

下敕亡得謝見勿復道邑到以爲大司馬大長秋

張邯爲大司徒崔發爲大司空司中壽容苗訢爲

國師同說侯林爲衛將軍莽夏憂懣不能食

師古曰懣音滿

又音悶

曹飲酒啗鰕魚

師古曰曹音但下亦類此鰕海魚也音電

讀軍書倦因

馮几寐不復就枕矣

師古曰馮讀曰憑

性好時日小數及事

迫急直爲厭勝遣使壞渭陵延陵園門罽毼曰毋

使民復思也又以墨洿色其周垣

師古曰洿洿之變其舊色也洿音一故反號

將至曰歲宿申水爲助將軍右庚刻木校尉前丙

耀金都尉又曰執大斧伐枯木流大水滅發火如

此屬不可勝記秋太白星流入太微燭地如月光成

紀隗崔兄弟共劫大尹李育

師古曰成紀隴西之縣

以兄子隗顯

爲大將軍攻殺雍州牧陳慶安定卒正王旬并其

衆移書郡縣數莽罪惡萬於桀紂是月析人鄧曄

于匡起兵南鄉百餘人

師古曰析南陽之縣南鄉析縣之鄉名析音先歷反

時析

宰將兵數千屯鄢亭備武關

師古曰鄢音口堯反

曄匡謂宰

曰劉帝已立君何不知命也宰請降盡得其衆曄

自稱輔漢左將軍匡右將軍拔析丹水攻武關都

尉朱萌降進攻右隊大夫宋綱殺之西拔湖

師古曰湖

弘農之縣也本屬京兆

莽愈憂不知所出崔發言周禮及春

秋左氏國有大災則哭以獸之

師古曰周禮春官之屬女巫氏之職曰凡邦之

大災歌哭而請哭者所以告哀也春秋左氏傳宣十二年楚子圍鄭旬有七日鄭人卜行成不吉卜臨于太宮且巷出車吉國人大

臨守陴者皆哭故發引之以爲言也獸音一葉反

故易稱先號咷後笑

師古曰同人九五爻

辭號咷哭
也咷音逃

宜呼嗟告天以求救莽自知敗迺率羣臣

至南郊陳其符命本末仰天曰皇天旣命授臣莽

何不殄滅衆賊即令臣莽非是願下雷霆誅臣莽

因搏心大哭氣盡伏而叩頭又作告天策自陳功

勞千餘言諸生小民會旦夕哭爲設殮粥

師古曰殮古食

字音千安反

甚悲哀及能誦策文者除以爲郎至五千餘

人薨憚將領之莽拜將軍九人皆以虎爲號號曰

九虎將北軍精兵數萬人東內其妻子宮中以爲

質時省中黃金萬斤者爲一匱尚有六十匱黃門

鉤盾臧府中尚方處處各有數匱長樂御府中御

府及都內平準帑藏錢帛珠玉財物甚衆

師古曰御府有令丞

少府之屬官也掌珍物中御府者皇后之府藏也平準令丞屬大司農亦珍貨所在也

莽愈愛之賜九

虎士人四千錢衆重怨無鬪意

師古曰重音直用反

九虎至華

陰回谿距隘北從河南至山于匡持數千弩乘堆

挑戰鄧曄將二萬餘人從闕鄉南出棗街作姑

師古

曰闕讀與聞同作姑邪道所由也

破其一部北出九虎後擊之六虎敗

走史熊王況誼闕歸死莽使使責死者安在皆自

殺其四虎亡

師古曰六人敗走二人誼闕自殺四人亡

三虎郭欽陳翬成重

收散卒保京師倉

師古曰九人之中六人敗走三人保倉也京師倉在華陰灌北渭口也輦音暉

鄧

曄開武關迎漢丞相司直李松將二千餘人至湖

與曄等共攻京師倉未下曄以弘農掾王憲為校尉將數百人北度渭入左馮翊界降城略地李松遣偏將軍韓臣等徑西至新豐與莽波水將軍戰波水走韓臣等追奔遂至長門宮王憲北至頻陽所過迎降

師古曰所至之處皆來迎而降附也

大姓櫟陽申碭下邳王大

皆率眾隨憲屬縣釐嚴春

師古曰屬縣三輔諸縣也釐屬右扶風釐讀與師

同其人姓嚴名春

茂陵董喜藍田王孟槐里汝臣蓋屋王扶

陽陵嚴本杜陵屠門少之屬

師古曰姓屠門名少

眾皆數千人

假號稱漢將時李松鄧曄以為京師小小倉尚未可下何況長安城當須更始帝大兵到即引軍至

華陰治攻具而長安受兵四會城下聞天水隗氏
兵方到皆爭欲先入城貪立大功鹵掠之利莽遣
使者分赦城中諸獄囚徒皆授兵殺豨飲其血與
誓曰有不爲新室者社鬼記之更始將軍史諶將
度渭橋皆散走諶空還衆兵發掘莽妻子父祖冢
燒其棺槨及九廟明堂辟雍火照城中或謂莽曰
城門卒東方人不可信莽更發越騎士爲衛門置
六百人各一校尉十月戊申朔兵從宣平城門入
民間所謂都門也師古曰長安城東出北頭第一門張邯行城門逢兵
見殺師古曰行音下更反王邑王林王巡薨憚等分將兵距擊

北闕下漢兵貪莽封力戰者七百餘人

師古曰獲莽當得封故貪之而

戰會日暮官府邸第盡燬二日己酉城中少年

朱弟張魚等恐見鹵掠趨謹竝和

師古曰衆羣行謹而自相和也和音乎卧反

燒作室門斧斂法闢

師古曰斂法殿名也闢小門也謂斧斂之也

譟曰反虜王

莽何不出降

師古曰譟音火故反其下亦同

火及掖庭承明黃皇室

主所居也莽避火宣室前殿火輒隨之宮人婦女

譟譟曰當柰何時莽紺袍服

師古曰譟古啼字也紺深青而楊赤色袍純也純爲紺服也袍

音均又帶璽韍持虞帝匕首天文郎按拭於前

師古曰拭

所以占時日天文郎今之用拭者也音式

曰時加某莽旋席隨斗柄而坐曰

天生德於予漢兵其如予何

師古曰論語稱孔子曰天生德於予桓魋其如予何故莽引之

以爲言也

莽時不食少氣困矣三日庚戌晨旦明羣臣

扶掖莽自前殿南下椒除

服虔曰邪行閣道下者也師古曰除殿陛之道也椒取芬香之名也

西出白虎門和新公王揖奉車待門外莽就車之

漸臺欲阻池水猶抱持符命威斗公卿大夫侍中黃

門郎從官尚千餘人隨之王邑晝夜戰罷極

師古曰罷音

疲士死傷略盡馳入宮間關至漸臺

師古曰間關猶言崎嶇展轉也

見

其子侍中睦解衣冠欲逃邑叱之令還父子共守莽

軍人入殿中諱曰反虜王莽安在有美人出房曰

在漸臺衆兵追之圍數百重臺上亦弓弩與相射

稍稍落去矢盡無以復射短兵接王邑父子鬪憊

王巡戰死莽入室下舖時衆兵上臺王揖趙博苗

訢唐尊王盛中常侍王參等皆死臺上商人杜吳

殺莽取其綬校尉東海公賓就故大行治禮

師古曰公賓姓

也就名也以先經治禮故識天子綬也見吳問綬主所在曰室中西北陬間

師古曰陬隅也音子侯反又音鄰就識斬莽首軍人分裂莽身支節肌

骨鬻分爭相殺者數十人

師古曰三輔舊事云鬻切千段

公賓就持莽

首詣王憲憲自稱漢大將軍城中兵數十萬皆屬

焉舍東宮

師古曰舍止宿也

妻莽後官乘其車服六日癸

丑李松鄧曄入長安將軍趙萌申屠建亦至以王

憲得璽綬不輒上多挾宮女建天子鼓旗收斬之

傳莽首詣更始縣宛市百姓共提擊之

師古曰提擲也音徒計反

或

切食其舌莽楊州牧李聖司命孔仁兵敗山東聖格死仁將其衆降已而歎曰吾聞食人食者死其事拔劔自刺死及曹部監杜普陳定大尹沈意九江連率賈萌皆守郡不降爲漢兵所誅賞都大尹王欽及郭欽守京師倉聞莽死乃降更始義之皆封爲侯太師王匡國將哀章降雒陽傳詣宛斬之嚴尤陳茂敗昆陽下走至沛郡譙自稱漢將召會吏民尤爲稱說王莽篡位天時所亡聖漢復興狀茂伏而涕泣聞故漢鍾武侯劉聖聚衆汝南稱尊

號尤茂降之以尤爲大司馬茂爲丞相十餘日敗

尤茂并死郡縣皆舉城降天下悉歸漢初申屠建

嘗事崔發爲詩

師古曰就發學詩

建至發降之後復稱說

師古

曰妄言符命不順漢

建令丞相劉賜斬發以徇史譔王延王林

王吳趙閔亦降復見殺初諸假號兵人人望封侯

申屠建旣斬王憲又揚言三輔黠共殺其主吏民

惶恐屬縣屯聚建等不能下馳白更始二年二月

更始到長安下詔大赦非王莽子他皆除其罪故

王氏宗族得全三輔悉平更始都長安居長樂宮

府臧完具獨未央宮燒攻莽三日死則案堵復故

更始至歲餘政教不行明年夏赤眉樊崇等衆數

十萬人入關立劉盆子稱尊號攻更始更始降之

赤眉遂燒長安宮室市里害更始民飢餓相食死

者數十萬長安爲虛

師古曰虛讀曰墟

城中無人行宗廟園

陵皆發掘唯霸陵杜陵完六月世祖即位然後宗

廟社稷復立天下艾安

師古曰艾讀曰乂

賛曰王莽始起外戚折節力行以要名譽宗族稱

孝師友歸仁及其居位輔政成哀之際勤勞國家

直道而行動見稱述豈所謂在家必聞在國必聞

色取仁而行違者邪

師古曰論語載孔子對子張之言也不仁之人假仁者之色而所行則違之朋黨比周

故能在家在國皆莽既不仁而有佞邪之材又乘四父歷
有名譽言故黃引之

世之權遭漢中微國統三絕而太后壽考爲之宗

主故得肆其姦慝以成篡盜之禍師故曰肆放也極也推是言

之亦天時非人力之致矣及其竊位南面處非所

據顛覆之執險於桀紂而莽晏然自以黃虞復出

也廼始恣睢奮其威詐師古曰睢音呼季反滔天虐民窮凶極

惡師古曰滔滔漫也毒流諸夏亂延蠻貉猶未足逞其欲焉

是以四海之內嘽然喪其樂生之心師古曰嘽然衆口愁貌也音五高反

中外憤怨遠近俱發城池不守支體分裂遂令天

下城邑爲虛師古曰虛讀曰墟丘壠發掘害徧生民辜及朽

骨自書傳所載亂臣賊子無道之人考其禍敗未
有如莽之甚者也昔秦燔詩書以立私議莽誦六
藝以文姦言師古曰以六經之事文飾姦言同歸殊塗俱用滅亡皆炕

龍絕氣非命之運

服虔曰易曰亢龍有悔謂無德而居高位也蘇林曰非命非天命之命也

紫色

蠅聲餘分閏位

應劭曰紫間色蠅邪音也服虔曰言莽不得正王之命知歲月之餘分爲閏也師古曰蠅者樂

之淫聲非正曲也近之學者便謂蠅之鳴已失其義又欲改此贊蠅聲爲蠅聲引詩匪鷄則鳴蒼蠅之聲尤穿鑿矣

聖王之

驅除云爾

蘇林曰聖王光武也爲光武驅除也師古曰言驅逐蠅除以待聖人也

王莽傳第六十九下



敘傳第七上

師古曰叙漢書以後分爲下卷

班固

漢書一百



祕書監護軍琅邪縣開國子顏

師古注

班氏之先與楚同姓令尹子文後也子文初生棄

於薈中而虎乳之

師古曰薈雲薈澤也春秋左氏傳曰楚若敖娶於邵生鬬伯比若敖卒從其母畜於邵淫

於邵子之女生子文焉邵夫人使棄諸薈中獸乳之邵子田見之懼而歸夫人以告遂使收之薈與夢同並音莫風反又音莫鳳反楚人

謂乳穀謂虎於擇

如淳曰穀音構牛羊乳汁之構師古曰穀讀如本字又音乃苟反於音烏擇字或作

莧並音塗故名穀於擇字子文楚人謂虎班其子以爲

號

師古曰子文之子闕班亦爲楚公子

秦之滅楚遷晉代之間因氏焉

師古

曰遂以始皇之末班壹避墜於樓煩

師古曰墜古地字樓煩鴈門之縣

致

馬牛羊數千羣值漢初定與民無禁當孝惠高后



時以財雄邊

師古曰國家不設衣服車旗之禁故班氏以多財而爲邊地之雄豪

出入弋獵

旌旗鼓吹年百餘歲以壽終故北方多以壹爲字

者

師古曰馬邑人聶壹之類也今流俗書本多改此傳壹字爲懿非也

壹生孺孺爲任俠州郡

歌之孺生長官至上谷守長生回以茂材爲長子

令

師古曰上黨之縣長讀如本字

回生況舉孝廉爲郎積功勞至上河

農都尉

師古曰上河地名農都者與農事

大司農奏課連最入爲左曹

越騎校尉成帝之初女爲婕妤致仕就第貲累千

金徙昌陵昌陵後罷大臣名家皆占數于長安

師古

曰占度也自隱度家之口數而著名籍也占音之瞻反

況生三子伯旂穉伯少受詩於

師丹大將軍王鳳薦伯宜勸學召見宴昵殿

張晏曰親戚宴

飲會同之殿

容貌甚麗誦說有法拜爲中常侍時上方鄉

學

師古曰鄉讀曰嚮

鄭寬中張禹朝夕入說尚書論語於金

華殿中

師古曰金華殿在未央宮

詔伯受焉旣通大義又講異同

於許商遷奉車都尉數年金華之業絕出與王許

子弟爲羣在於綺襦紵袴之間非其好也

晉灼曰白綺之襦冰紵之

袴也師古曰紵素也綺今細綾也並貴戚子弟之服

家本北邊志節忼慨數求使匈

奴河平中單于來朝上使伯持節迎於塞下會定

襄大姓石李羣輩報怨殺追捕吏

師古曰報私怨而殺人吏追捕之又殺吏

伯上狀因自請願試守期月

師古曰欲守定襄太守期音基

上遣侍中

中郎將王舜馳傳代伯護單于

師古曰傳音張戀反

并奉璽書

印綬即拜伯爲定襄太守

師古曰即就也
就其所居而拜

定襄聞伯

素貴年少自請治劇畏其下車作威吏民竦息伯

至請問耆老父祖故人有舊恩者

師古曰
請召也

迎延滿堂

日爲供具

師古曰酒食之具
也供音居用反

執子孫禮郡中益弛

師古曰
弛解也

見伯不用威
刑故自解縱

諸所賓禮皆名豪懷恩醉酒共諫伯宜頗

攝錄盜賊具言本謀亡匿處伯曰是所望於父師

矣

師古曰齒爲諸父尊
之如師故曰父師

迺召屬縣長吏選精進掾史

師古

曰精明而
進趨也

分部收捕

師古曰分
音扶問反

及它隱伏旬日盡得郡

中震栗咸稱神明

師古曰栗
古栗字

歲餘上徵伯伯上書願

過故郡上父祖冢有詔大守都尉以下會

師古曰同
赴其所

因召宗族各以親疎加恩施散數百金北州以爲

榮長老紀焉

師古曰紀記也

道病中風

師古曰中傷也爲風所傷

旣至以侍

中光祿大夫養病

師古曰受其秩俸而在自養也

賞賜甚厚數年

未能起會許皇后廢班婕妤供養東宮

李奇曰元后成帝母

進

侍者李平爲婕妤而趙飛燕爲皇后伯遂稱篤久

之上出過臨候伯伯惶恐起眠事

師古曰眠古視字

自大將

軍薨後

師古曰王鳳

富平定陵侯張放淳于長等始愛

幸出爲微行行則同輿執轡入侍禁中設宴飲之

會及趙李諸侍中皆引滿舉白

服虔曰舉滿杯有餘白灑者罰之也孟康曰舉白見

驗飲酒盡不也師古曰謂引取滿觴而飲飲訖舉觴告白盡不也一說白者罰爵之名也飲有不盡者則以此爵罰之魏文侯與大夫飲酒令曰

不矚者浮以大白於是公談笑大噓師古曰笑古笑字也噓噓笑聲也音其略反或曰噓謂唇

口之中大笑則見此說非時乘輿幄坐張畫屏風師古曰坐音才卧反畫紂醉

踞姐已作長夜之樂上以伯新起數目禮之師古曰目視而

之因顧指畫而問伯紂爲無道至於是虐伯對曰

書云廼用婦人之言師古曰今文尚書泰誓之辭何有踞肆於朝師古

曰肆放也陳也所謂衆惡歸之不如是之甚者也師古曰論語稱孔子曰紂之不

善不如是之甚也是以君子惡居下流上曰苟不若此此圖何

戒伯曰沈湎于酒微子所以告去也師古曰微子躬之鄉士封於微爵稱子

也躬紂錯亂天命微子作誥告箕子比干而去紂其誥曰用沈湎于酒用亂敗厥德于下我其發出狂吾家耄遜于荒事見尚書微子篇

式號式諄大雅所以流連也師古曰大雅蕩之詩曰式號式諄俾畫作夜言醉酒號呼以

晝爲夜也。流連言作詩之人嗟歎而泣涕流連也。而說者乃以流連詩爲茶三蓋失之矣。大雅所以流連不謂飲酒之人也。諱音火故反。言

書淫亂之戒其原皆在於酒上。迺喟然歎曰：吾久

不見班生，今日復聞讜言。

師古曰：讜言，善言也。音黨。

放等不憚

師古

曰：憚，悅也。音亦。

稍自引起，更衣因罷出。時長信、庭林表適使

來聞見之。

孟康曰：長信，太后宮名也。庭林表，宮中婦人官名也。師古曰：長信，宮庭之林表也。林表，宮名耳。庭非官稱也。

後上朝東宮，太后泣曰：帝閒顏色瘦黑。

師古曰：閒，謂比日也。

班待

中本大將軍所舉，宜寵異之，益求其比以輔聖德。

師古曰：比類也。音必寐反。

宜遣富平侯且就國。上曰：諾。車騎將軍

王音聞之，以風丞相御史。

師古曰：風，讀曰諷。

奏富平侯罪過

上，迺出放爲邊都尉。後復徵，又太后與上書曰：前

所道尚未效

張晏曰謂上所言班侍中
李太將軍所舉宜寵異之

富平侯反復來其

能默虜

如淳曰富平侯張放復來
太后安能默然不以爲言

上謝曰請今奉詔是時

許商爲少府師丹爲光祿勳上於是引商丹入爲

光祿大夫伯遷水衡都尉與兩師並侍中

如淳曰兩師
許商師丹

皆秩中二千石每朝東宮常從及有大政俱使諭

指於公卿上亦稍厭游宴復脩經書之業太后甚

悅丞相方進復奏富平侯竟就國會伯病卒年三

十八朝廷愍惜焉旂博學有俊材左將軍史丹舉

賢良方正以對策爲議郎遷諫大夫右曹中郎將

與劉向校祕書每奏事

師古曰旂每
奏校書之事

旂以選受詔進

讀羣書

師古曰於天子前讀書

上器其能賜以祕書之副時

書不布

師古曰謂不出之於羣下

自東平思王以叔父求太史公

諸子書大將軍白不許語在東平王傳

師古曰此言東平王求書

不得而旂獲賜祕書明見寵異

旂亦早卒有子曰嗣顯名當世穉少

爲黃門郎中常侍方直自守成帝季年立定阿王

爲大子數遣中盾請問近臣

師古曰盾讀曰允百官表云詹事之屬官也漢舊儀

云秩四百石主徵巡官中

穉獨不敢荅

師古曰言其慎

哀帝即位出穉爲

西河屬國都尉遷廣平相王莽少與穉兄弟同列

友善兄事旂而弟畜穉

師古曰事旂如兄遇穉如弟

旂之卒也脩

總麻賻贈甚厚

師古曰送終者布帛曰賻車馬曰賻贈音附贈音芳鳳反

平帝即位

太后臨朝莽秉政方欲文致太平

師古曰言欲以文教致太平

使使

者分行風俗采頌聲

師古曰行音下更反

而穉無所上

師古曰不稱符瑞及

歌頌琅邪太守公孫闕言災害於公府太司空甄豐

遣屬馳至兩郡諷吏民

師古曰遣言祥應而隱除災害

而刻閔空造

不祥穉絕嘉應嫉害聖政皆不道太后曰不宜德

美宜與言災害者異罰且後宮賢家我所哀也

師古

曰班婕妤有賢德故哀閔其家

閔獨下獄誅穉懼上書陳恩謝罪願

歸相印入補延陵園郎太后許焉食故祿終身由

是班氏不顯莽朝亦不罹咎

師古曰罹遭也

初成帝性寬進

入直言是以王音濯方進等繩法舉過

師古曰論天子之過失

而劉向杜鄴王章朱雲之徒肆意犯上

師古曰肆極也

故自

帝師安昌侯諸舅大將軍兄弟及公卿大夫後宮

外屬史許之家有貴寵者莫不被文傷詆

師古曰詆毀也音子禮反

唯谷永嘗言建始河平之際許班之貴傾動前朝

熏灼四方賞賜無量空虛內臧女寵至極不可尚

矣今之後起天所不饗什倍於前永指以駁譏趙

李亦無間云

師古曰雖谷永嘗有此言而意專在趙李耳自餘劉向之徒又皆不論班氏也間非也音居莧反

釋生彪彪字叔皮幼與從兄嗣共遊學家有賜書

內足於財好古之士自遠方至父黨楊子雲以下

莫不造門

師古曰造至也音千到反

嗣雖脩儒學然貴老嚴之術

師古曰老老子也嚴莊周也

桓生欲借其書

師古曰桓譚

嗣報曰若夫嚴子

者絕聖棄智脩生保真清虛澹泊歸之自然

師古曰澹泊安

靜也澹音徒濫反泊音步各反又音魄

獨師友造化而不爲世俗所役者

也漁釣於一壑則萬物不好其志

師古曰奸犯也音干

栖遲於

一丘則天下不易其樂不結聖人之罔

師古曰結讀與挂同聖人謂周孔

不皞驕君之餌

應劭曰皞音六畜之畜師古曰皞古嗅字也餌謂爵祿君所以制使其臣亦猶釣魚之餌

蕩然肆志談者不得而名焉

師古曰肆放也

故可貴也今吾

子已貫仁誼之羈絆繫名聲之韁鎖

師古曰韁如馬韁也音薑

伏周孔之軌躅

鄭氏曰躅迹也三輔謂牛蹄處爲躅師古曰躅音丈欲反

馳顏閔之極

摯

劉德曰摯至也行之所極至既繫縶於世教矣何用大道爲自

眩曜

師古曰言用老子莊周之道何爲但欲以名自眩曜耳眩音州縣之縣

昔有學步於邯

鄲者曾未得其髣髴又復失其故步遂匍匐而

歸耳

師古曰匍音扶匐音蒲北反

恐似此類故不進

師古曰言不與其書

嗣之行

已持論如此叔皮唯聖人之道然後盡心焉

張晏曰固不欲

言父諱舉其字耳

年二十遭王莽敗世祖即位於冀州時隗

囂據龍擁衆招輯英俊

師古曰輯與集同

而公孫述稱帝於

蜀漢天下雲擾

師古曰言盜賊擾亂如雲而起

大者連州郡小者據

縣邑囂問彪曰往者周亡戰國並爭天下分裂數

世然後廼定其抑者從橫之事復起於今乎

師古曰抑語辭

將承運迭興在於一人也

師古曰迭互也音大結反

願先生論之對曰

周之廢興與漢異昔周立爵五等諸侯從政

師古曰言諸侯

之國各別爲政

本根旣微枝葉強大

師古曰本根謂王室也枝葉謂諸侯

故其末流

有從橫之事其勢然也漢家承秦之制並立郡縣

主有專己之威臣無百年之柄至於成帝假借外

家

師古曰假音工暇反借音子夜反

哀平短祚國嗣三絕危自上起傷不

及下故王氏之貴傾擅朝廷能竊號位而不根於民

師古曰言無據援

是以即真之後天下莫不引領而歎十餘

年間外內騷擾遠近俱發假號雲合咸稱劉氏不

謀同辭方今雄桀帶州城者皆無七國世業之資

詩云皇矣上帝臨下有赫鑒觀四方求民之莫

師古

曰大雅皇矣之詩也皇大也上帝天也莫定也言大矣天之視下赫然甚明監察衆國求人所定而受之今民皆謳吟

思漢鄉仰劉氏已可知矣

師古曰鄉讀曰嚮

頌曰先生言周

漢之執可也至於但見愚民習識劉氏姓號之故

而謂漢家復興跡矣昔秦失其鹿劉季逐而擣之

師古曰倚偏持其足也音居蟻反

時民復知漢虐旣感蹕言又恣狂狡

之不息迺著王命論以救時難其辭曰昔在帝

堯之禪曰咨爾舜天之歷數在爾躬舜亦以命禹

師古曰事見論語

臬于稷契咸佐唐虞

師古曰契讀與禹同字本作偃

光濟

四海弈世載德

師古曰載乘也言相因不絕

至于湯武而有天下雖

其遭遇異時禪代不同至乎應天順民其揆一也

師古曰言堯舜以文德相禪湯武以征伐代興各上應天命下順人心是故劉氏承堯之祚氏

族之世著乎春秋

師古曰謂士會歸晉其處者爲劉氏

唐據火德而漢

紹之始起沛澤則神母夜號以章赤帝之符由是

言之帝王之祚必有明聖顯懿之德豐功厚利積

繫之業

師古曰繫古累字

然後精誠通於神明流澤加於生

民故能爲鬼神所福饗天下所歸徃未見運世無本

功德不紀

師古曰不紀不爲人所說

而得屈起在此位者也

師古曰屈起特起也

屈音其勿反

世俗見高祖興於布衣不達其故以爲適遭

暴亂得奮其劍游說之士至比天下於逐鹿幸捷

而得之不知神器有命不可以智力求也

劉德曰神器爾聖也李

奇曰帝王賞罰之柄也師古曰李說是也

悲夫此世所以多亂臣賊子者也

若然者豈徒闇於天道哉又不覩之於人事矣夫

餓饉流隸飢寒道路

師古曰隸賤隸

思有裋褐之褻儋石之

畜

師古曰褻謂親身之衣也音先列反一說云衣破壞之餘曰褻儋石解在崩通傳音丁濫反畜讀曰蓄

所願不過

一金然終於轉死溝壑何則貧窮亦有命也況虐

天子之貴四海之富神明之祚可得而妄處哉故

雖遭罹阮會竊其權柄

師古曰罹亦遭也音離

勇如信布彊如

梁籍成如王莽然卒潤鑊伏質耳醢分裂

師古曰質鎡也

伏於鎡上而斬之也鎡音竹林反

又況么磨骨尚不及數子

鄭氏曰磨骨音麼小也晉灼曰此骨

偏磨骨之磨骨也師古曰鄭音是也么磨皆微小之稱也么音一堯反麼音莫可反骨偏磨骨自音麻與此義不相合晉說失之

而欲

閹奸天位者虐

師古曰奸音干

是故駑蹇之乘不騁千里

之塗燕雀之疇不奮六翮之用棗枕之材不荷棟

梁之任

師古曰棗即薄櫨所謂枿也枕梁上短柱也棗百節字亦或作節枕音之說反

斗筭之子不

秉帝王之重

師古曰斗筭言小器也解在公孫劉田傳筭音山交反

易曰鼎折足覆

公餽

師古曰鼎卦九四爻辭也餽食也音速

不勝其任也當秦之末豪桀

共推陳嬰而王之嬰母止之曰自吾爲子家婦而

世貧賤

師古曰而汝也

卒富貴不祥不如以兵屬人

師古曰屬委也

音之欲反事成少受其利不成禍有所歸嬰從其言而

陳氏以寧王陵之母亦見項氏之必亡而劉氏之

將興也是時陵爲漢將而母獲於楚有漢使來陵

母見之謂曰願告吾子漢王長者必得天下子謹

事之無有二心遂對漢使伏劍而死以固勉陵其

後果定於漢陵爲宰相封侯夫以匹婦之明師古曰凡言匹夫匹婦謂凡庶

之人一夫一婦當相配匹猶能推事理之致探禍福之機而全宗祀

於無窮垂策書於春秋師古曰春秋史書記事之總稱而況大丈夫

之事虐是故窮達有命吉凶由人嬰母知廢陵母

知興審此四者帝王之分決矣師古曰分音扶問反蓋在高祖

其興也有五師古曰王命論叙高祖之德及班氏漢書叙目所稱引事皆具見本書不煩更解以穰篇籍其有

辭句隱互尋覽難知者則具釋焉浮汎之說蓋無取也一曰帝堯之苗裔二曰體貌

多奇異三曰神武有徵應四曰寬明而仁恕五曰

知人善任使加之以信誠好謀達於聽受見善如

不及用人如由己從諫如順流趣時如嚮赴

師古曰嚮讀曰

響音如響之赴聲也當食吐哺納子房之策拔足揮洗揖酈生

之說寤戍卒之言斷懷土之情

師古曰洛陽近沛高祖來都關中故云斷懷土之情

也斷音丁喚反高四皓之名割肌膚之愛

晉灼曰不立戚夫人子

舉韓信

於行陳收陳平於亡命英雄陳力羣策畢舉此高

祖之大略所以成帝業也若廼靈瑞符應又可略

聞矣初劉媪任高祖而夢與神遇

師古曰任謂懷任也

震電晦

冥有龍蛇之怪及其長而多靈有異於衆是以王

武感物而折券呂公覩形而進女秦皇東游以厭

其氣呂后望雲而知所處

師古曰厭音一葉反

始受命則白蛇

分西入關則五星聚故淮陰留侯謂之天授非人

力也歷古今之得失驗行事之成敗稽帝王之世

運考五者之所謂取舍不厭斯位符瑞不同斯度

劉德曰厭當也師古曰音二涉反

而苟昧於權利越次妄據

師古曰昧貪也

外不量

力內不知命則必喪保家之主失天年之壽遇折

足之凶伏鈇鉞之誅

師古曰鈇音方于反

英雄誠知覺寤畏若

禍戒

師古曰若順也

超然遠覽淵然深識收陵嬰之明分

絕信布之覲覲

師古曰分音扶問反覲音異覲音踰

距逐鹿之鼓譟說審神

器之有授母貪不可幾爲二母之所咲

師古曰不可幾謂不可庶幾而

望也一說則福祚流于子孫天祿其永終矣知隗幾讀曰冀蹠

終不寤廼避墜於河西師古曰墜古地字河西大將軍竇融

嘉其美德訪問焉師古曰每事皆與謀舉茂材爲徐令以病去

官後數應三公之召仕不爲祿所如不合師古曰如往也不苟

得祿故所往之學不爲人博而不俗言不爲華述而處不合其意

不作有子曰固弱冠而孤師古曰謂年二十也作幽通之賦以

致命遂志劉德曰致極也陳古凶性命遂明己之志其辭曰系高項之玄曹

兮氏中葉之炳靈應劭曰系連也曹緒也言己高陽顯項之連緒也顯項北方水位故稱玄中葉謂令尹子

文也虎乳故曰炳靈繇凱風而蟬蛻兮雄朔野以颺聲應劭曰凱風南風也

朔北方也言先祖自楚遷北若蟬之蛻也師古皇十紀而鴻漸兮繇繇讀與由同由從也蛻音稅颺讀與楊同

有羽儀於上京

應劭曰十紀漢十世也張晏曰易曰鴻漸于陸其羽可以爲儀成帝時班況女爲婕妤父子並

在京師爲朝臣也

巨滔天而泯夏兮考遘愍巨行謠應

晉灼曰皇漢皇也曰巨王莽字巨君也張晏曰彪遇王莽之敗憂思歌謠也師古曰滔

慢也言不畏天也泯滅也夏諸夏也考班固自言其父也遘遇也愍憂也

徒歌終保已而貽則兮里上仁之所廬師古曰言其父遭時濁亂以道自安

終遺盛法而處仁者所居也論語稱孔子曰懿前烈之純淑

里仁爲美擇不處仁焉得智故引以爲辭

兮窮與達其必濟師古曰因自言美前人之餘業窮則咨孤

矇之眇眇兮將圯絕而罔階師古曰眇眇微細也圯毀也固自言孤弱懼將毀絕先人之跡

無階路以自成豈余身之足殉兮悼世業之可懷師古曰殉營也悼字與躋同躋

是也懷思也靖潛處以永思兮經日月而彌遠匪黨人之敢拾兮庶斯言之不玷蘇林曰拾音負拾應劭曰拾更也自謙不敢與鄉人更進也師古曰靖古

靜字也拾音其業反魂煒煒與神交兮精誠發於宵寐

夢登山而迥眺兮覲幽人之髣髴張晏曰幽人神人也師古曰覲見也音迪

檻葛藟而授余兮眷峻谷曰勿隧師古曰檻執取也言入峻谷者當攀葛藟可

以免於顛墜猶處時俗者當據道義然後得用自立故設此喻託以夢也藟葛藟蔓也一說藟葛屬也葛之與藟皆有蔓焉檻音攬其字

從手藟音力水反 眴眴寤而仰思兮心蒙蒙猶未察孟康曰眴眴早旦也

覺寤思念未知其吉凶也師古曰眴音忽昕音欣 黃神邈而靡質兮儀遺識以臆

對應劭曰黃帝善占夢久遠無從得問準其識書以意求其象也賈誼曰識言其度應劭曰臆胷臆也師古曰對合韻音丁

忽曰乘高而選神兮道遐通而不迷師古曰登山見神故曰乘高也選遇

也音五故反又音五各反 葛藟藟於樛木兮詠南風以爲綏應劭曰周南國

風其詩曰南有樛木葛藟纍纍之樂只君子福履綏之師古蓋惴

惴之臨深兮乃二雅之所祗

師古曰詩小雅小宛之篇曰惴惴小心如臨于谷惴惴恐

懼之貌也小旻篇曰戰戰兢兢如臨深淵如履薄冰言恐墜陷也故云二雅之所祗惴音之瑞反

既諄爾以告

象兮又申之以炯戒

師古曰諄告也炯明也諄音碎炯音公迥反

孟子盡言以

迨羣兮辰倏忽其不再

服虔曰盡何不也孟勉也晉進也迨及也何不早進仕以及輩也師

古曰辰時也倏忽疾也言時疾過不再來也倏音式六反

承靈訓其虛徐兮竚盤桓而

且俟

孟康曰虛徐懷疑也張晏曰佇久也俟待也

惟天墜之無窮兮魚鱉生民之

晦在

晉灼曰魚鱉古鮮字也應劭曰晦無幾也師古曰墜古地字也魚鱉少也言天地長久而人壽短促也魚鱉音先踐反

紛屯

亶與蹇連兮何艱多而智寡

孟康曰世艱難多智者少故遇禍也師古曰易屯卦

六二又辭曰屯如亶如蹇卦六四又辭曰往蹇來連皆謂險難之時也亶音竹延反連音力善反

上聖寤而

後拔兮豈羣黎之所御

師古曰黎衆也言上聖之人猶遇紛難覩機能寤然後自拔文王姜里孔

子於匡是也至於衆庶豈能豫禦之哉

昔衛叔之御昆兮昆爲寇而喪子

孟康曰御迎也昆兄也衛叔武迎兄成公成公今前驅射殺之師古曰御音五駕反衛叔解在五行志

管寧弧欲

斃讎兮讎作后而成己

師古曰謂管仲射桓公中帶鉤桓公反國以爲相也

變化故

而相詭兮孰云豫其終始

師古曰詭違也

雍造惡而先賞

兮丁繇惠而被戮

師古曰雍雍齒也丁公也繇讀與由同

梟取弔于道

吉兮王膺慶於所感

應劭曰栗孝景姬也有子而以妬見廢王宣帝王婕妤也以無子爲憂而

以謹敕得母元帝也師古曰適古攸字也攸亦所也

畔回穴其若茲兮北叟頗識其

倚伏

師古曰畔亂貌也回穴轉旋之意也叟老人稱也淮南子曰北塞上之人其馬無故亡入胡中人皆弔之其父曰此何詎

不爲福居數月其馬將胡駿馬而歸人皆賀之對曰此何詎不爲禍家富馬良其子好騎墮而折髀人皆弔之對曰此何詎不爲福

居一年胡夷大入丁壯者皆控弦而戰塞上之人死者十九此獨以跋之故父子相保老子德經曰禍兮福所倚福兮禍所伏故頗

識其倚伏倚
音於綺反

單治裏而外凋兮張脩襮而內逼

應劭曰單單豹

也靜居其所以理五內處深山爲虎所食張張毅也外脩恭敬斯徒馬圍皆與亢禮不勝其勞內熱而死師古曰襮表也單音善襮

音布吹中蘇爲庶幾兮顏與冉又不得

師古曰吹古聿字也蘇古和字也聿

曰也曰中和之道可以庶幾免於禍難而顏回早死冉耕惡疾爲善之人又不得其報也

溺招路以從己

兮謂孔氏猶未可安怕怕而不能兮卒隕身虛世

旣節展曰怕怕亂貌也茆避也師古曰溺榮溺也路子路也論語稱長沮桀溺耦而耕孔子過之使子路問津焉桀溺曰子孔丘

之徒歟對曰然曰怕怕者天下皆是也而誰以易之且而與其從避人之士豈若從避世之士哉言天下皆亂汝將用誰變易之乎避人

之士謂孔子避世之士溺自謂也而子路安之卒不能避乃遇蒯瞶之亂身死敵也怕音土高反茆音扶味反字本作排其音同

游聖門而靡救兮顧覆醢其何補

師古曰禮記云孔子哭子路於中庭既哭

進使者而問故使者曰醢之矣遂命覆醢賦言子路游於聖人之門而孔子不能救之以免於難雖爲覆醢無所補益

固行行

其必凶兮免盜亂爲賴道

師古曰論語稱閔子侍側閔

曰若由也不得其死然又稱子路曰君子上勇乎曰君子義以爲上君子有勇而無義爲亂小人有勇而無義爲盜賊言子路稟行行之性其凶必也所以免爲於亂盜者賴聞道於孔子也行行剛強之貌也行音胡浪反形氣發于根柢兮柯

葉彙而靈茂

師古曰柢本也彙盛也靈善也言草木本根氣強則枝葉盛而善美人之先祖有大功德則胤緒

亦蕃昌也柢音丁計反茂合韻音莫口反

恐同蝻之責景兮慶未得其云已

師古曰慶發語辭讀與羌同已止也莊子云罔兩問景曰曩子行今子止曩子坐今子起何其無持操歟景曰吾有待而然吾所待又有待而然賦言景之行止皆隨於形草木枝葉各稟根柢之餘慶資於積善亦猶此也黎淳耀于高

平兮芊彊大於南汜

應劭曰黎楚之先也醇美也高平帝譽之號芊楚姓汜崖也師古曰言黎在高

辛之時爲火正有美光耀故其後嗣霸有楚國於南方也汜江水之別也音祀邵南之詩曰江有汜芊音弭

羸取

威於百儀兮姜本支序三止

應劭曰羸秦姓也伯益之後也伯益爲虞有儀鳥獸百物

之功秦所由取威於六國也姜齊姓也止禮也
齊伯夷之後伯夷爲秩宗典天地人鬼之禮也
既仁得其信然

兮叩天路而同軌

劉德曰人道既然仰視天道又同法也師古曰仁得謂求仁而得仁叩讀曰叩

東公

虐而殲仁兮王合位虐三五

應劭曰東以紂也殲盡也王武王也欲合五位三所即國

語歲日月星辰之所在也師古曰山古鄰字也仁即三仁也國語稱
冷州鳩對景王曰昔武王伐殷歲在鶉火月在天駟曰在析木之津
辰在斗杓星在天龍星與日辰之位皆在北維顓頊之所建也我姬
氏出自天龍又析木者有建星及牽牛焉則我皇妣大姜之姓伯陵
之後逢公之所憑神也歲之所在則我有周之分野也月之所在辰爲
農祥也我太祖后稷之所經緯也王欲合是五位三所而用之五位謂
歲日月辰星也三所謂逢公所憑
神周分野所在后稷所經緯也

戎女烈而喪孝兮伯徂歸

於龍虎

孟康曰伯晉文公也歲在卯出歷十九年過一周歲在酉
入卯爲龍酉爲虎也師古曰戎女驪戎之女謂驪姬也烈

酷也孝謂太子申生也伯讀曰霸言文公霸
諸侯也徂往也言以龍往出以獸歸戎也

發還師以成性

兮重醉行而自耦

師古曰發武王名也性命也武王初觀兵於
孟津八百諸侯不期而會皆曰紂可伐矣武

王曰爾未知天性還師二年紂殺比干囚箕子武王乃伐克之於是成天命也重謂重耳晉文公名也耦合也文公初出奔至齊齊桓公妻之有馬二十乘文公欲安之齊姜乃與子犯謀醉而遣之後遂反國與時會也震鱗繫于夏庭方

币三正而滅周

應劭曰易震爲龍鱗蟲之長也繫洙也師古曰謂衰如也解在五行志三正歷夏殷

周也繫音丑之反正音之盈反

異羽化于宣宮芳彌五辟而成災

應劭曰易巽爲

鷄羽蟲也宣帝時未央宮路軫殿中雌鷄化爲雄元后統政之祥也至平帝歷五世而王莽篡位

道悠長而世

短芳負冥默而不周

劉德曰負遠也周至也冥默玄深不可通至也

胥仍物而鬼

諏芳迺窮宙而達幽

應劭曰胥須也仍因也諏謀也易曰人謀鬼謀百姓與能往古來今日當聖人

須因卜筮然後謀鬼神極古今通幽微也

媯巢姜於孺筮芳且筭祀于挈龜

應劭曰媯陳姓也巢居也姜齊姓也孺少也陳完少時其父厲公使周史卜得居有齊國之卦也李奇曰筭數也祀年也周公卜居洛

得出三十年七百也師古曰挈刻也詩大雅雅絲絲之篇曰爰挈我龜言刻開之灼而卜之挈音口計反

宣曹興

敗於下夢兮魯衛名諡於銘謠

應劭曰周宣王牧人夢衆魚與旗旄之祥而中興

曹伯陽國人夢衆君子立于社官謀亡曹而曹亡也孟康曰魯文成之世童謠言稠父喪勞宋父以驕後昭公名稠遂死於野

井定公名宋即位而驕衛靈公掘地得石椁其銘曰靈公遂以爲諡妣聆叭而刻石兮許相

理而鞠條

應劭曰妣叔向之母也石叔向之子也聽其帝聲刻知其後必滅羊舌氏許負相周亞夫從理入口當餓死鞠

窮也條亞夫所封也師古曰鞠告也

道混成而自然兮術同原而分流

師古曰大

道混壹歸於自然人之所趨雖有流別本則同耳

神先心以定命兮命隨行以消

息

師古曰言神明之道雖在人心之前已定命矣然亦隨其所行以致禍福

幹流遷其不濟兮

故遭罹而羸縮

師古曰幹轉也言人之生各有遭遇不能必濟免於困厄各隨其所逢以致舛虧也

三變同於一體兮雖移盈然不忒

孟康曰晉大夫欒書子廙廙子盈書賢

而覆厭廙廙惡而害易也師古曰欒書曰欒武子也廙惡欒桓子也盈欒懷子也春秋左氏傳稱秦伯問於士鞅曰晉大夫其誰先亡對曰其欒氏乎欒廙沐虐

以甚猶可以免其在盈乎武子之德在人如周人之思邵公愛其甘
棠況其子乎藥厭黑死盈之善未能及人武子所施沒矣厭黑之惡實彰
將於是在其後至襄公二十一年終爲范宣子所逐而出
奔楚自楚適齊二十三年自齊入于晉晉人遂滅欒氏也
洞參

差其紛錯兮斯衆兆之所惑

師古曰衆兆兆庶也

周賈盪而貢

憤兮齊死生與既福

孟康曰莊周賈誼也貢惑也憤亂也故盪惑亂死生禍福之正也

抗

爽言以矯情兮信畏犧而忌服

孟康曰莊周不欲爲犧牛賈誼惡忌服鳥也師古

曰抗舉也爽差也謂二人雖舉言齊死生壹禍福而心實不然

是差繆也所貴聖人之至論兮

順天性而斷誼

師古曰斷誼謂以誼斷之斷音丁奐反

物有欲而不居兮

亦有惡而不避

師古曰言富貴人之所欲不以其道則君子不居死亡人之所惡處得其節則君子不避也

守孔約而不貳兮憑輶德而無累

師古曰孔甚也輶輕也言守其甚約執心不貳

舉德至輕無所累惑斯爲可矣詩大雅烝人之篇曰德輶如毛人鮮克舉之輶音弋九反又音猶

三仁殊而一

致芳夷惠然而齊聲

師古曰三仁紂賢臣也論語稱微子去之箕子爲之奴比干諫而死孔子曰

殷有三仁焉夷伯夷也惠柳下惠也賦言微子箕子比干所行各異而並稱仁伯夷不義武王伐殷至于不食周粟而死柳下

惠三黜不去應父母之木偃息曰蕃魏芳申重繭曰存

邦志執乖糾俱有令名荆

師古曰木段于木也客居魏魏文侯游而禮之過其間未嘗不載也秦欲伐魏或諫曰魏君賢者是禮國人稱仁未可圖

也秦遂止兵申謂申包胥荆即楚也繭足下傷起如繭也楚昭王時吳師入郢昭王出奔申包胥如秦乞師踰越險阻曾繭重眠立於

秦庭號哭七日秦哀公出師救楚而敗吳師昭王反國將賞紀焚包胥包胥辭曰吾所以重繭爲君耳非爲身也逃不受賞紀焚

躬以衛上芳皓頤志而弗營師古曰紀紀信也脫漢王於難而爲項羽所燒皓四皓也處商

洛深山高祖求之不得侯中木之區別芳苟能實而必榮

自養其志無所營屈要沒世而不朽芳廼先民之所程

應劭曰侯維也張晏曰苟能有仁義之道

必有榮名也師古曰侯發語辭也爾雅曰伊惟侯也程正也言人之操行所尚不同立德立言期於不朽亦猶蘭蕙松栢各有本性馨香烈

梓幹並擅貞芳此乃古昔賢人以爲正道也論語稱
子夏曰君子之道辟諸草木區以別矣故賦引之 觀天罔之

絃覆芳實斐湛而相順 應劭曰斐輔也湛誠也相助也師
古曰尚書大誥曰天斐湛辭詩

大雅蕩之篇曰天生烝人其命匪諶易上繫辭曰天之所助者順
也賦言天道惟誠是輔唯順是助故引以爲辭也斐讀與匪同諶

音上 謨先聖之大繇芳亦以惠而助信 劉德曰以近也師
林反 謨先聖之大繇芳亦以惠而助信 古曰謨謀也繇

道也 以古鄰字詩小雅巧言之篇曰秩秩大繇聖人謨之論語稱
孔子曰德不孤必有鄰易上繫辭曰人之所助者信也賦言若能

謀聖人之大道有德者必爲同志所依 虞韶美而儀鳳芳孔忘
履信者必獲他人之助謨音摹又音莫

味於千載 師古曰韶舜樂名也虎吳書舜典曰蕭韶九成鳳皇
來儀論語云孔子在齊聞韶三月不知肉味賦言

孔子去舜 素文信而底麟芳漢賈祚于異代 應劭曰底
千歲也 致也孔子

作春秋素王之文有視明禮脩之信而致麟漢 精通靈而感
封其後爲褒成及紹嘉公係躬後爲二代之客

物芳神動氣而入微養游睇而援號芳李虎發而

石開

師古曰養養由基也楚之善射者游睢沔眇也楚王使由基射猿操弓而眇之猿抱木而號知其必見中也李季廣

也夜遇石以爲猛獸而射之中石沒羽也

非精誠其焉通方苟無實其孰

信

師古曰信合韻音新

操末技猶必然方矧湛躬於道真

師古曰矧況也

湛讀曰耽躬親也射者微技猶能精誠感於猿石況立身種德親耽大道而不能者乎

登孔顥而上

下

方緯羣龍之所經

應劭曰顥太顥也孔子也羣龍喻羣聖也自伏羲下訖孔子終始天道

備矣孟康曰孔甚也顥大也聖人作經賢者緯之也師古曰應說孔顥是也孟說經緯是也顥音胡老反

朝貞觀

而夕化方猶誼已而遺形

應劭曰貞正也觀見也誼忘也易曰天地之道貞觀者也張晏

曰言朝觀大道而夕死可也師古曰形已尚可遺忘況外物者哉誼音許元反又許遠反

若胤彭而偕老方

訴來哲以通情

師古曰彭彭祖也老老聃也言有繼續彭祖之志外躡老聃之跡者則可與言至道而通

情亂曰天造中昧立性命方

應劭曰天道始造萬物草創於冥昧中中皆立其性命也

師古曰易屯卦彖辭曰復心引道惟賢聖應劭曰易曰天造草昧故賦引之

之心乎論語曰人能弘道師古曰渾元天地之氣也渾元運物流不處師古曰渾元天地之氣也

音胡保身遺名民之表音胡舍生取誼亦道用音胡

應劭曰孟子曰生我所欲也義我所欲也二者不可得兼舍生而取義也師古曰舍置也憂傷天物忝莫

痛晉灼曰忝沒也言死莫痛於是也師古曰此說非也忝辱也言不達性命自取憂傷爲物所天既辱且痛莫過於此

吳爾大素曷渝色服虔曰守死善道不滌流俗是爲浩爾太素何有變渝者哉師古曰渝音踰

尚粵其義淪神域應劭曰尚上也粵於也易曰知幾其神乎淪入也師古曰尚庶幾也願也

永平中爲郎典校祕書專篤志於博學以著述爲

業或譏以無功又感東方朔楊雄自諭以不遭蘇

張范蔡之時曾不折之以正道明君子之所守故

聊復應焉其辭曰賓戲主人曰蓋聞聖人有壹定

之論烈士有不易之分亦云名而已矣如淳曰唯貴得名也故

太上有立德其次有立功夫德不得後身而特盛

功不得背時而獨章是以聖喆之治棲棲皇皇師古

曰不安之意也孔席不煖墨突不黔師古曰孔孔子墨墨翟也突竈突也黔黑也言志在明道不暇

安由此言之取舍者昔人之上務著作者前列之

餘事耳劉德曰取者施行道德舍者守靜無爲也今吾子幸游帝王之世躬

帶冕之服師古曰帶大帶也冕冠也浮英華湛道德師古曰湛讀曰沈華謂名譽也言外

則有美名善譽內續龍虎之文舊矣孟康曰續被也易曰大人虎變其文

炳也言文章之盛久也晉灼曰續視也言目厭見其文久矣師古曰尋其下句孟說是也續音莫限反卒不能據

首尾奮翼異鱗振拔滂塗跨騰風雲

師古曰據申也滂傳水塗泥也以龍爲喻也滂

音一故反又音烏

使見之者景駭聞之者嚮震辰

師古曰嚮讀曰嚮見景則駭聞

響則震合韻音之人反

徒樂枕經藉書紆體衡門

師古曰紆屈也衡門橫一

木於門上

上無所帶下無所根獨據意虛宇宙之外銳

思於豪芒之內潛神默記恒以年歲

如淳曰恒音豆音之且師古曰宇宙

之外言宏廣也豪芒之內喻纖微也恒工贈反

然而器不賈於當己用不效於

一世

劉德曰賈辭也師古曰當己謂及己身尚在猶言當年也賈音古又音工暇反辭音上究反

雖馳

辯如濤波摘藻如春華

師古曰大波曰濤摘布也藻文辭也

猶無益於殿

最

師古曰殿音丁見反

意者且運朝夕之策定合會之計使存

有顯號亡有美諡不亦優虛主人道爾而咲曰

師古曰適

古攸字也
攸咲貌也

若賓之言斯所謂見執利之莖聞道德之實

守突奧之熒燭未叩天庭而覩白日也

應劭曰爾雅東南隅謂之突西

南隅謂之奧師古曰突奧室中之二隅也熒熒小光之燭也叩讀曰仰突音烏了反其字從亢天聲也

曩者王塗

蕪穢周失其御侯伯方軌戰國橫騫於是七雄虓

闕分裂諸夏

應劭曰七雄秦及六國也師古曰虓音呼交反闕音呼取反

龍戰而虎爭

游說之徒風颺電激並起而救之

師古曰颺讀與揚同

其餘焱

飛景附煜雪其間者蓋不可勝載

師古曰焱疾風也煜雪光貌也煜音

干及反雪音下甲反煜又音育

當此之時搦朽摩鈍鋌刀皆能壹斷

師古曰搦按也音女角反斷音丁煥反

是故魯連飛一矢而蹶千金虞卿

以顧眄而捐相印也

應劭曰魯連齊人也齊國燕燕將保於聊城魯連係帛書於矢射與

之爲陳利害燕將得之泣而自殺譏切魏新垣行使不尊秦爲帝
秦時圖邯鄲爲却五十里趙遂以安趙王以千金爲魯連壽不受
魏齊爲秦所購迫急走趙趙相虞卿與齊有故然愍其窮於是
解相印閒行與奔魏公子無忌也李奇曰蹙蹙也距也師古曰
蹙音厥又音其月反夫啾發投曲感耳之聲合之律度淫蕩而

不可聽者非韶夏之樂也

李奇曰蕩不正之音也師古曰啾發啾啾小聲而發也投曲趣合屬

曲也感耳動應衆庶之耳也然而合律度君子所不聽也淫蕩非正之聲也不謂蕩蕩之鳴也

啾音子由反因執

合變偶時之會風移俗易乖忤而不可通者非君

子之法也

師古曰雖偶當時之會而不可以移風易俗

及至從人合之衡人

散之

師古曰從音子庸反

亡命漂說霸旅騁辭

師古曰漂浮也音匹遙反

商鞅

挾三術以鑢孝公李斯奮時務而要始皇

應劭曰王霸富國強

兵爲二術也師古曰王一也霸二也富國強兵三也

彼皆躡風雲之會履顛沛之執

師古曰顛

據傲乘邪以求一日之富貴

師古曰傲要也據可以要迎之

時也徵音工堯反徵字或作傲激發也

朝爲榮華夕而焦瘁

師古曰焦音在消反瘁與

倅福不盈眦既溢於世

李奇曰當富貴之間視不滿目故言不盈眦也

凶人且

以自悔況吉士而是賴虐

師古曰賴利也

且功不可以虛成

名不可以爲立韓設辯以徵君呂行詐以賈國

師古

曰賈市賈也音古

說難既酋其身廼囚秦貨既貴厥宗亦

隧

應劭曰酋音酋寡之酋酋雄也說難韓非書篇名也呂不韋効千金於秦立子楚爲王封十萬戶侯以陰事

自殺也師古曰呂不韋初見子楚在趙而云此奇貨可居故班氏謂子楚爲秦貨耳安說効千金乎應說失之矣

是故

仲尼抗浮雲之志孟軻養浩然之氣

張晏曰孔子云不義而富且貴

於我如浮雲孟軻曰我善養吾浩然之氣而無害則塞乎天地之間也師古曰浩然純壹之氣也

彼豈樂爲

迂闊哉道不可以貳也

師古曰迂遠也音于

方今大漢洒埽羣

穢夷險芟荒

師古曰洒所釐反汙也汙音信

廓帝紘恢皇綱基隆於

羲農規廣於黃唐其君天下也炎之如日威之如神

函之如海養之如春

師古曰函容也讀與含同

是以六合之內莫

不同原共流沐浴玄德

師古曰原水泉之本也流者其末流也

稟卬太和

枝附葉著

師古曰卬讀曰仰著音直洛反

譬猶中木之殖山林鳥魚

之毓川澤

師古曰殖生也長也毓與育同

得氣者蕃滋失時者零落

師古曰零與零同

參天墜而施化豈云人事之厚薄哉

師古曰墜

古地

今子處皇世而論戰國耀所聞而疑所覲

曰覲見也音徒歷反

欲從旄敦而度高庠泰山懷沈濫而測深

虞重淵亦未至也

應劭曰爾雅前高曰施丘如覆敦者敦丘側出曰仇泉正出曰鑑泉師古曰數

音丁回反度音徒各反沈音軌

賓曰若夫鞅斯之倫襄周之凶人既

聞命矣敢問上古之士處身行道輔世成名可述於後者默而已虞主人曰何爲其然也昔咎繇謨

虞箕子訪周

師古曰訪亦謀

言通帝王謀合聖神殷說夢

發於傅巖周望兆動於渭濱

師古曰說傳說也解已在前望謂太公望即呂尚也鈞

於渭水文王將出獵卜之曰所得非龍非螭非豹非羆乃帝王之輔果遇呂尚於渭陽與語大悅曰吾太公望子父矣故號曰太公望

齊寧再激聲於康衢漢良受書於邳沂

鄭氏曰五達曰康衢

達曰衢晉灼曰沂崖也下邳水之崖也師古曰齊寧寧戚也聲激謂叩角所歌也沂音牛斤反皆竣命而神

交匪詞言之所信

師古曰信合韻音新

故能建必然之策展無

窮之勲也近者陸子優繇新語以興鄭氏曰優繇不仕也師古曰繇讀與

同董生下帷發藻儒林劉向司籍辯章舊聞楊雄

覃思法言大玄師古曰覃大也深也比日及昔君之門闡究先聖

之壺奧應劭曰宮中門謂之闡宮中巷謂之壺師古曰壺音苦本反婆娑安術藝

之場休息虛篇籍之囿以全其質而發其文用納

虛聖聽列炳於後人斯非其亞與師古曰亞次也與讀曰歟若廼夷

抗行於首陽惠降志於辱仕師古曰夷伯夷也惠柳下惠也辱仕謂爲土師三黜也

顏耽樂於簞瓢孔終篇於西狩師古曰謂作春秋止於獲麟也狩合韻音守

聲盈塞於天淵具吾徒之師表也且吾聞之壹陰

壹陽天墜之方師古曰墜古地字廼文廼質王道之綱有同

有異聖詰之常故曰慎修所志守爾天符委命共

己味道之腴

師古曰共讀曰恭腴肥也

神之聽之名其舍諸

師古曰舍廢也

諸之也言修志委命則明神聽之祐以福祿自然有名永不廢也

賓又不聞龢氏之璧韞於

荆石

師古曰龢古和字也韞亦藏也音於粉反

隨侯之珠臧於蚌蛤虍

師古曰虍即虎

字也音平項反

歷世莫眠不知其將含景耀吐英精

曠千載而流夜光也應龍潛於潢汙魚鼃媒之

師古曰

曰應龍龍有翼者潢汙停水也媒謂侮狎之也潢音黃汙音烏

不覩其能奮靈德合

風雲超忽荒而踈顓蒼也

師古曰踈以足據持也顓顓天其

色蒼蒼蒼故曰蒼天踈音戢

故夫泥蟠而天飛者應龍之神也先賤

而後貴者龢隨之珍也昔闇而久章者君子之真

也師古曰時聞若廼牙曠清耳於管絃離婁眇目於

豪分師古曰牙伯牙也曠師曠也逢蒙絕技於弧矢班輸

權巧於斧斤師古曰逢蒙古善射者也班輸即魯公輸班也

故樂府云誰能為此器公輸與良樂軼能於相馭烏獲

抗力於千鈞師古曰良王良也樂伯樂也軼與逸龠鵲發

精於鍼石研桑心計於無垠孟康曰研古之善計也桑桑

鵲扁鵲也研計研也一號僕亦不任廁技於彼列故密

爾自娛於斯文師古曰密

漢書敘傳第七十上

敘傳第七十下

班固

漢書一百

祕書監上護軍琅邪縣開國子顏囂注

固以爲唐虞三代詩書所及世有典籍故雖堯舜之盛必有典謨之篇然後揚名於後世冠德於百王

師古曰德爲百王之上也

故曰巍巍乎其有成功煥乎其有文章也

師古曰此篇論語載孔子美堯舜之言也

漢紹堯運以建帝業至於六

世史臣乃追述功德私作本紀

師古曰謂武帝時司馬遷作史記

編於

百王之末廁於秦項之列太初呂後闕而不錄故

採纂前記綴輯所聞

師古曰纂與撰同輯與集同

以述漢書起元

高祖終於孝平王莽之誅十有二世二百三十年綜

其行事旁貫五經上下洽通

師古曰固所撰諸表序及志經典之義在於是也 爲

春秋考紀表志傳凡百篇

師古曰春秋考紀謂帝紀也而俗之學者不詳此文乃云漢書

一名春秋考紀蓋失之矣

其叙曰

師古曰自皇矣漢祖以下諸叙皆班固自論撰漢書意此亦依放史記之叙目耳史遷則

云爲某事作某本紀某列傳班固謙不言作而改言述蓋避作者之謂聖而取述者之謂明也但後之學者不曉此爲漢書叙目見有述字因謂此文追述漢書之事乃呼爲漢書述失之遠矣摯虞尚有此惑其餘曷足怪乎

皇矣漢祖纂

堯之緒實天生德聰明神武秦人不綱罔漏于楚

師古

曰言秦失綱維故高祖因時而起罔漏于楚謂項羽雖有害虐之心終免於患也一說楚王陳涉初起後又破滅也

爰茲發迹

斷蛇奮旅神母告符朱旗廼舉粵蹈秦郊嬰來稽

首革命創制三章是紀應天順民五星同晷

師古曰晷景也

項氏畔換黜我巴漢

孟康曰畔反也換易也不用義帝要換易與高祖漢中也師古曰此說非也畔

換強恣之貌猶言跋扈也詩大雅皇矣篇曰無然畔換

西土宅心戰士憤怨

劉德曰宅居也西方

人皆居心於高祖猶係心也書曰惟衆宅心晉灼曰西土關西也高祖入關約法三章秦民大說皆宅心高祖

乘轡而運

席卷三秦割據河山保此懷民

師古曰保安也懷人懷德之人也

股肱

蕭曹杜稷是經爪牙信布腹心良平龔行天罰赫

赫明明述高紀第一

孝惠短世高后稱制罔顧

天顯呂宗以敗

劉德曰罔無也顧念也顯明也言呂氏無念天之明道者徒念王諸呂以至於敗亡矣

述惠紀第二高后紀第三

太宗穆穆允恭玄默

化民以躬帥下以德農不供貢阜不收斂

張晏曰除民田租之

稅是不供貢也

宮不新館陵不崇墓

師古曰墓合韻音謨

我德如風民應

如中

師古曰論語稱孔子曰君子之德風小人之德中也故引以爲辭

國富刑清登我漢道

師古曰

述文紀第四

孝景蒞政諸侯方命

孟康曰尚書云方命

圯族言鯀之惡壞其族類吳楚七國亦然

克伐七國王室以定匪怠匪荒務

在農桑著于甲令民用寧康

晉灼曰甲令即景紀今甲也

述景紀

第五 世宗曄曄思弘祖業

師古曰曄曄盛貌也

曄咨熙載髦

俊竝作

師古曰曄誰也咨謀也熙興也載事也謀於衆賢誰可任用故能興其事業也作起也

厥作伊何

百蠻是攘

師古曰攘攘卻也

恢我疆宇外博四荒

師古恢廣也博大也

武功

既抗亦迪斯文

劉德曰迪進也

憲章六學統壹聖具封禪

郊祀登秩百神協律改正饗食茲永年

張晏曰改正謂從建寅之月也

述武紀第六

孝昭幼冲冢宰惟忠燕蓋壽張實

獻實聰

如淳曰壽音鞠應劭曰壽張誑也

阜人斯得邦家和同述昭

紀第七

中宗明明皇帝用刑名

劉展曰時舉傅納聽

斷惟精

李奇曰時是也於是時也選用賢者師古曰傳讀曰敷虞書舜典曰敷納以言敷陳也謂有陳言者則納而用之

柔遠能邇燁燁威靈

師古曰虞書舜典柔遠能邇柔安也能善也故引之云燁燁也音充善反

龍荒幕朔莫不來庭

孟康曰謂白龍堆荒服沙幕也師古曰龍匈奴祭天龍城非謂白龍堆也朔北

方不顯祖烈尚於有成

師古曰丕大也烈業也

述宣紀第八

孝元翼翼高明柔克

師古曰翼翼敬也尚書洪範云高明柔克謂人雖有高明之度而當執柔

乃能成德也叙言元帝有柔克之姿也

賓禮故老優繇亮直

師古曰故老謂貢禹薛廣德也優繇

謂寬容也亮直謂朱雲也繇讀與由同

外割禁囿內損御服離宮不衛山

陵不邑

張晏曰不徙民著縣

閹尹之詖穢我明德

如淳曰任弘恭石顯使為政以病其治也

師古曰謂官人為閹者言其精氣奄閉不泄也一曰主奄閉門者尹正也詖與穢同

述元紀第九

孝成

煌煌臨朝有光威儀之盛如圭如璋壹闡恣趙朝

政在王

師古曰趙謂趙皇后及昭儀也王謂外家王鳳王音等

炎炎燎火亦允不陽

張晏曰天子盛威若燎火之陽今委政王氏不炎熾矣師古曰允信也

述成紀第十 孝哀彬

彬克撫威神

師古曰彬彬文質備也言哀帝念孝成之時權在臣下故自撫持其威神也撫執取也其字從手

彫落洪支底剝鼎臣

服虔曰彫落洪支廢退王氏也底致也周禮有屋誅誅大臣於屋下不露也易曰

鼎折足其形渥凶謂誅朱博王嘉之屬也晉灼曰剝刑也師古曰剝者厚刑謂重誅也音握服言屋下失其義也

婉孌董

公惟亮天功大過之困實撓實凶

應劭曰以董賢爲三公乃欲共成天功也

易大過卦棟撓凶言以小材而爲棟梁不堪其任至於折撓而凶也師古曰婉孌美貌亮助也尚書舜典曰各貢亮天功故引之也撓曲

也音女

述哀紀第士

孝平不造新都作宰不周不

伊喪我四海

師古曰造成也遭家業不成周頌曰閔予小子遭家不造故引之也言其自號宰衡而無周公伊尹

之忠信也述平紀第十二 漢初受命諸侯立政制自項

氏十有八姓述異姓諸侯王表第一 太祖元勳

啓立輔臣支庶藩屏侯王並尊述諸侯王表第二

侯王之祉祚及宗子公族蕃滋支葉碩茂

師古曰茂合韻音莫

反口述王子侯表第三 受命之初贊功剖符弈世弘

業爵土廼昭

師古曰贊功佐命之功也弈大也

述高惠高后孝文功臣

侯表第四 景征吳楚武興師旅後昆承平亦猶

有紹

師古曰言景武之時以軍功故封侯者多有昭昭宣以後雖承平尚有以勲獲爵土者

述景武昭

宣元成哀功臣侯表第五 亡德不報爰存二代

應劭

曰二代三王後也師古曰二代謂殷周也言德澤深遠故至漢朝其子孫又受茅土以奉祭祀宰相外戚昭睦

見戒

張晏曰躋是也明其是者戒其非也

述外戚恩澤侯表第六漢迪

于秦有革有因

劉德曰迪至也

擢舉僚職並列其人

晉灼曰擢音麤

擢之擢師古曰擢音才戶反謂大略也

述百官公卿表第七

篇章博舉通

于上下略差名號九品之叙述古今人表第八元元

本本數始於一

張晏曰數之元本一起於初九之一也

產氣黃鍾造計秒忽

劉德曰秒禾芒也忽蜘蛛網細者也師古曰秒音眇其字從禾

八音七始五聲六律

劉德曰七始天

地四方人之始也師古曰解在禮樂志

度量權衡歷算道出

師古曰道古攸字也攸所也官

失學微六家分乖

劉德曰六家謂黃帝顓頊夏桀周魯歷也

壹彼壹此庶研

其幾述律歷志第一

上天下澤春雷奮奮作

劉德曰允

下乾上履坤下震上豫履禮也豫樂也取易象制禮作樂師古曰易象曰上天下澤履雷出地奮豫故具引其文

先王

觀象爰制禮樂厥後崩壞鄭衛荒淫風流民化

酒紛紛

師古曰言上風既流下人則化也酒移也紛紛雜亂也酒音莫踐

略存大綱以統舊

文述禮樂志第二

雷電皆至天威震耀五刑之

作是則是效

劉德曰震下離上噬嗑利用獄雷電取象天威也師古曰易象辭曰雷電噬嗑先王以明罰敕法故引之

威實輔德刑亦助教季世不詳背本爭末

師古曰不詳謂不盡

用刑之理也周書呂刑曰告爾詳刑

吳孫狙詐申商酷烈

師古曰狙音千豫反

漢章九

法太宗改作

張晏曰改除肉刑也

輕重之差世有定籍述刑法

志第三

厥初生民食貨惟先割制廬井定爾土

田什一供貢下富上尊商以足用茂遷有無貨自

龜貝至此五銖揚擢古今監世盈虛

師古曰揚舉也擢引也揚擢者舉而

引之陳其趣也
擢音居學反

述食貨志第四 昔在上聖昭事百神類

帝禋宗望秩山川明德惟馨永世豐年季末淫

祀營信巫史

鄧展曰營惑也

大夫臚岱侯伯僭時

鄭氏曰臚岱

山是也應劭曰僭時秦文公造四時祭天是也師古曰旅陳也臚亦陳也臚旅聲相近其義一耳

放誕之徒緣間

而起

師古曰謂方士言神仙之術也

瞻前顧後正其終始述郊祀志第

五 炫炫上天縣象著明

師古曰炫炫光耀之貌音胡晒反縣古懸字

日月周

輝星辰垂精百官立法宮室混成

張晏曰星辰有宮室百官各應其象以見咎徵

也降應王政景以燭形

張晏曰王政失於此星辰變於彼猶景之象形

三季之後

厥事放紛

師古曰三季三代之末也放失也紛亂也

舉其占應覽故考新述天

文志第六

河圖命庖洛書賜禹八卦成列九疇

遁叙

李奇曰河圖即八卦也洛書即洪範九疇也師古曰庖廩也遁古攸字

世代寔寶光演文

武春秋之占咎徵是舉告往知來王事之表述五

行志第七

坤作墜執高下九則

張晏曰易曰地執坤劉德曰九則九州土田上

中下九等也師古曰墜古地字易象曰地執坤君子以厚德載物高下謂地形也一日地之肥瘠也

自昔黃唐經

略萬國燮定東西疆理南北

師古曰燮和也疆理謂立封疆而統理也

三代損

益降及秦漢革剗五等制立郡縣

晉灼曰剗音剗削之剗師古曰音初限反

略表山川彰其剖判述地理志第八

夏乘四載

百川是導

師古曰四載解在溝洫志

唯河爲難災及後代商竭周

移秦浹南涯

服虔曰河竭而商亡移亦何移徙也如淳曰秦始自本紀浹河灌大梁遂滅之通爲溝洫淮泗

自茲

距漢北亡八支

服虔曰本有九河今塞餘有一也

文陞東野武作瓠歌

服虔曰陟音因文帝塞河於酸棗也張晏曰河決瓠子武帝親臨悼功不成而作歌成有平年後遂滂

沱劉德曰成帝治河已平改元曰河平元年爰及溝渠利我國家述溝洫志

第九 處義畫卦書契後作師古曰處讀曰伏同虞夏商周

孔纂其業纂書刪詩綴禮正樂師古曰纂與撰同彖系大易

因史立法師古曰謂修春秋定帝王之文六學既登遭世罔弘師古曰罔無也無能

弘大正道也羣言紛亂諸子相騰師古曰騰騰馳也秦人是滅漢修其

缺劉向司籍九流以別應劭曰儒道陰陽法名墨從橫雜曲農凡九家爰著目錄

略序洪烈師古曰洪大也烈業也述藝文志第十 上熲下暴

惟盜是伐師古曰易上繫辭云小人而乘君子之器盜思奪之矣上熲下暴盜思伐之矣引此言者謂秦胡亥之時

勝廣燹起梁籍扇烈師古曰飛火曰燹扇熾也烈猛也言陳勝初起而項羽烈盛也燹音必遙反

赫赫炎炎遂焚咸陽宰割諸夏命立侯王誅嬰放

懷詐虐以亡述陳勝項籍傳第一 張陳之交游如

父子攜手遂秦拊翼俱起應劭曰遂逃也師古曰遂古避字也拊翼以雞爲喻言知將且則

鼓擊其翼而鳴也據國爭權還爲豺虎師古曰言反相吞噬也耳謀甘公

作漢藩輔述張耳陳餘傳第二 三枿之起本根既

朽劉德曰詩云包有三枿爾雅曰烈枿餘也謂木斫髡而復枿生也喻魏齊韓皆滅而復起若髡木更生也師古曰枿音五葛反枯楊

生華曷惟其舊應劭曰易云枯楊生華暫貴之意也曷惟其舊言不能久也師古曰枯楊華大過卦九五爻辭也舊

合韻音曰橫雖雄材伏于海隅沐浴尸鄉北面奉首旅人

慕殉義過黃鳥劉德曰黃鳥之詩刺秦穆公要之從死言今橫不要而有從者故曰過之述魏豹

田儋韓信傳第三 信惟餓隸布實黥徒越亦狗

盜芮尹江湖

張晏曰吳芮爲番陽令在江湖之間尹主也

雲起龍襄化爲侯

王

師古曰襄舉也

割有齊楚跨制淮梁

張晏曰韓信前王齊徙楚英布王淮南彭越王梁也

綰自同閑鎮我北疆

應劭曰閑音扞盧綰與高祖同里楚名里門爲扞師古曰左氏傳云高其閑

閱舊通語耳非專楚也

德薄位尊非昨惟殃吳克忠信胤嗣廼

長述韓彭英盧吳傳第四

賈廩從旅爲鎮淮楚

張晏曰劉賈晚乃從軍也晉灼曰廩無綫也師古曰二說皆非也廩古以爲勤字言賈從軍有勤勞也

澤王琅邪權

激諸呂渾之受吳疆土踰矩

師古曰矩法制也

雖戒東南終

用齊斧

張晏曰齊斧越斧也以整齊天下也晉灼曰雖戒勿反而反竟用此斧於吳也師古曰易云喪其齊斧故引以爲辭

述荆燕吳傳第五

大上四子伯兮早天仲氏王

代存宅于楚

師古曰詩衛風云伯兮揭兮鄘風又曰仲氏任只此序方論高祖兄伯及仲故引二句爲之辭也

戊實淫缺平陸廼紹

師古曰楚戊爲薄太后服茲削東海郡遂與吳共反而誅景帝更立平陸侯禮

續元王之後也

其在于京弈世宗正

師古曰正合韻音征

劬勞王室用侯

陽成子政博學三世成名

師古曰謂劉德劉向劉歆俱有名聞

述楚元王

傳第六 季氏之訕辱身毀節信于上將議臣震

栗

張晏曰申意於上將上將樊噲也欲以十萬衆橫行匈奴中布曰噲可斬也時議臣皆恐師古曰信讀曰申

樂公哭

梁田叔殉趙見危授命誼動明主布歷燕齊叔亦

相魯民思其政或金或社

李奇曰魯人愛田叔死送之以金齊貴樂布爲生立社

述季

布樂布田叔傳第七 高祖八子二帝六王三趙

不辜淮厲自亡燕靈絕嗣齊悼特昌掩有東土自

岱徂海支庶分王前後九子六國誅斃適齊亡祀

城陽濟北後承我國

張晏曰濟北王恐吳楚反後徙王淄川元朝中齊國絕悼惠王後唯有城陽淄川

武帝乃割臨淄環悼惠王冢以與淄川令奉祀也師古曰適讀曰嫡

趙趙景王匡漢社稷師古曰趙

趙武顏音糾

述高五王傳第八

猗與元勲包漢舉信劉德

曰包取也師古曰包漢謂勸高祖且王漢中也舉信舉韓信也信合韻音新

鎮守關中足食成軍

營都立宮定制脩文平陽玄默繼而弗革

師古曰革改也言曹

參爲相守靜無爲一遵蕭何約束不變改也

民用作歌化我淳德漢之宗臣

是謂相國述蕭何曹參傳第九 留侯蕭秦作漢

腹心

劉德曰蕭秦椎始皇於博狼沙中

圖折武關解阮鵠門

師古曰圖折武關謂從師

師公入武關說今爲疑兵又啗秦將以利勸因其怠懈擊之類也

推齊銷印毆致越信

師古曰毆

與驅同越彭越也信亦韓信也謂於垓下圍項羽時也信合韻音新

招賈四老惟寧嗣君陳

公擐攘歸漢廼安

師古曰攘音人義反

斃范二項走狄禽韓

師古

曰走狄謂解平城之圍也禽韓偽游雲夢也

六哥既設我罔艱難

師古曰罔無也

安國

廷爭致仕杜門絳侯矯矯誅呂尊文亞夫守節吳

楚有勳述張陳王周傳第十 舞陽鼓刀滕公廢

騶

師古曰鼓刀謂屠狗也

潁陰商販曲周庸夫攀龍附鳳立乘

天衢

師古曰乘登也

述樊鄴滕灌傅靳周傳第十一 北平志

古司秦柱下

師古曰志記也謂多記古事也司主也

定漢章程律度之緒建

平質直犯上千色

師古曰周昌先封建成侯蓋謂此也平字當爲成傳寫誤耳

廣阿之塵

食厥舊德

張晏曰任敖也吏遇呂后不謹敖擊傷主吏也師古曰塵亦勤字也易訟卦六三交辭曰食舊德食猶饗也

故安執節責通請錯寒寒帝臣匪躬之故

師古曰易蹇卦

六二爻辭曰王臣蹇蹇匪躬之故此言申屠嘉召責鄧通請誅朝錯皆不爲己身實有蹇蹇之節也述張周趙任申

屠傳第十二食其監門長揖漢王畫龍陳留進收

教倉塞隘杜津王基以張師古曰杜亦塞也謂說令塞白馬津賈作行人

百越來賓從容風議博我以文李奇曰作新語也師古曰論語稱顏回喟然歎曰夫子

博我以文謂以文章開博我也此言陸賈嘗之越也從音千容反風讀曰諷敬繇役夫遷京定都

師古曰繇讀與由同言內強關中外和匈奴叔孫奉常劉歆由戍卒而來納說

與時抑揚稅介免冑禮義是創師古曰稅舍也介甲也創始造之也創合韻初良反

或忤或謀觀國之光師古曰詩小雅小旻之篇曰或忤或謀言有智者有謀者易觀卦六四爻辭曰觀

國之光利用賓于王故合而爲言也述酈陸朱婁叔孫傳第十三師古曰本傳作朱劉終書其賜

姓也此言朱婁本其舊族耳淮南僭狂二子受殃安辯而邪賜頑

以荒敢行稱亂窘世薦亡

師古曰窘仍也薦讀曰荐荐再也長遷死雍其子安又自殺也

述淮南衡山濟北傳第六

蒯通壹說三雄是敗

覆酈驕韓田橫顛沛被之拘係廼成患害

師古曰言五被初不從王

反王繫其父母乃進邪謀終以遇害也

充躬罔極交亂弘大

師古曰小雅青蠅之詩云讒言罔極交亂

四國此叙言江充息夫躬之惡引以爲辭也

述蒯伍江息夫傳第十五 萬石溫

溫幼寤聖君

鄧展曰爾雅寤逢遇也師古曰此說非也言萬石幼而恭謹感寤高祖以見識拔也爾雅云逢遇也非謂

寤也詩小雅小宛之篇曰溫溫恭人

宜爾子孫天天伸伸

師古曰詩周南蟋蟀之篇曰宜爾子孫振

振兮論語稱孔子燕居伸伸如也天天如也謂和舒之貌此言萬石子孫既多又皆和睦故引以爲辭也天音於驕反慶社于

齊不言動民

鄧展曰爲齊相齊爲立社也

衛直周張淑慎其身

師古

曰衛詩燕燕之篇曰終溫且惠淑慎其身淑善也引此詩言以美四人也

述萬石衛直周張傳第十

六 孝文三王代孝二梁

師古曰代孝王參及梁孝王武梁懷王揖

懷折亡

嗣孝乃尊光

師古曰折謂夭也孝亦謂梁孝王也

內爲母弟外扞吳楚怙

寵矜功僭欲失所思心旣霽牛旣告妖

師古曰霽傳霽也音莫候

反解在五行志

帝庸親親厥國五分

師古曰庸用也用親親之道故分梁爲五國立孝王男五

人爲王太子買爲梁王次子明爲濟川王彭離爲濟東王定爲山陽王不識爲濟陰王

德不堪寵四支不

傳

晉灼曰子父母之四支也師古曰此說非也謂孝王支子四人卦述爲王者皆絕於身不傳胤嗣唯梁恭王買有後耳其事具在本傳

文三王傳第十七

賈生矯矯弱冠登朝

師古曰矯矯高舉之貌也合韻

驕遭文叡聖屢抗其蹠暴秦之戒三代是據建設

藩屏以強守圉

師古曰圉合韻音御

吳楚合從賴誼之慮

師古曰勸

文帝大封梁淮陽梁卒距吳楚不得令西也從音子容反

述賈誼傳第十八

子絲慊

慨激辭納說

師古曰愛盎字絲此加子者子是昂稱以偶句耳

檻轡正席顯陳

成敗

師古曰檻執取也其字從手亦或作孽

錯之瑣材智小謀大

師古曰易下繫辭曰

德薄而位尊智小而謀大力少而任重鮮不及矣此叙言朝錯所以及禍既如發機先寇受害

師古

曰發機言其速也吳楚未敗之前錯已誅死

述爰盎朝錯傳第十九

釋之典

刑國憲以平馮公矯魏增主之明

張晏曰矯辭以免魏尚也師古曰張說非

也矯正也

長孺剛直美我形于色下折淮南上正元服

師古曰淮南王謀反憚黯正直武帝不冠不見黯故云下折淮南上正元服也元首也故謂冠爲元服

莊之推賢

於茲爲德述張馮汲鄭傳第二十

榮如辱如有

機有樞

劉德曰易曰樞機之發榮辱之主也張晏曰乍榮乍辱如辭也

自下摩上惟德之隅

師古曰詩大雅抑之篇曰抑抑威儀惟德之隅言有廉隅也此叙言賈山直詞刺上示爲方正也一曰隅謂得道德之一隅也

賴依

忠正君子采諸

師古曰諸之也

述賈鄒枚路傳第二十一

魏其翩翩好節慕聲

師古曰翩翩自喜之貌

灌夫矜勇武安驕

盈凶德相挺翫敗用成

師古曰挺謂柔挺也音式延反

安國壯趾王

恢兵首

孟康曰易壯于趾征凶安國臨苗爲丞相憤車蹇後爲將多所傷失而憂死此爲不宜征行而有凶也師古曰壯

千趾大壯初九爻辭也壯傷也趾足也直謂憤車蹇耳不言不宜征行也

彼若天命此近人咎

師古曰彼韓安

國也此王恢也壯趾天命也謀兵人咎也

述竇田灌韓傳第二十二

景十三王

承文之慶

師古曰言景帝庸主耳所以子皆得王者由文帝之德慶流子孫也慶合韻音卿

魯恭館

室江都諺輕

師古曰諺謂輕佻也音初教反

趙敬險詖中山淫營

師古曰詖

辭也一曰佞也營音榮也音詠合韻音榮

長沙寂漠廣川亡聲膠東不亮

常山驕盈

如淳曰亮信也閭淮南謀反作戰具守備後辭及之發病死是爲不信於漢朝

四國絕祀河

間賢明

李奇曰臨江哀王闕臨江閔王榮膠西于王端清河哀王乘皆無子國除

禮樂是修爲漢

宗英述景十三王傳第二十三

李廣恂恂實獲士

心控弦貫石威動北隣

師古曰北隣謂匈奴也

躬戰七十遂死

于軍敢怨衛青見討去病陵不引決忝世滅姓

師古曰忝

辱也蘇武信節不詘王命

師古曰信讀曰申

述李廣蘇建傳第

二十四 長平桓桓上將之元

師古曰桓桓武貌也元首也

薄伐獫狁

恢我朔邊

師古曰恢廣也

戎車七征衝軻閑閑

鄧展曰軻兵車名也師古曰軻音彭

合圍單于北登闐顏票騎冠軍焱勇紛紜

師古曰如焱之勇紛

然盛也

長驅六舉電擊雷震

師古曰六舉凡六出擊匈奴也震合韻音之人反

飲

馬翰海封狼居山西規大河列郡祁連

張晏曰置郡至祁連山

述

衛青霍去病傳第二十五 抑抑仲舒再相諸侯師古

曰爾雅云抑抑密也身脩國治致仕縣車下帷覃思論道屬書

師古曰屬音之欲反讜言訪對爲世純儒師古曰讜善言也訪對讀對所訪也讜音黨述董

仲舒傳第二十六 文豔用寡子虛烏有寓言淫麗

託風終始師古曰寓寄也風讀曰諷多識博物有可觀采蔚爲辭

宗賦頌之首師古曰蔚文綵盛也音鬱述司馬相如傳第二十七

平津斤斤晚躋金門師古曰斤斤明察也躋外也金門金馬門也既登爵位祿

賜頤賢師古曰頤養也謂引招賢人而養也布衾疎食用儉飭身師古曰飭整也讀與

同卜式耕牧以求其志忠寤明君廼爵廼試兒生疊

疊束髮脩學師古曰疊疊勉也偕列名臣從政輔治述公孫

弘式兒寬傳第二十八 張湯遂達用事任職媚茲

一人日旰忘食

師古曰詩大雅下武之篇曰媚茲一人應侯慎德一人天子也媚愛也此叙言張湯見愛於武帝

既成寵祿亦羅咎慝安世溫良塞淵其德

師古曰詩邶風

燕燕之篇曰仲氏任只其心塞淵淵深也實塞也謂其德既實且深也此叙言子孺亦有之

子孫遵業全祚

保國述張湯傳第二十九

杜周治文唯上淺深

師古

曰言觀天子之意也

用取世資幸而免身延年寬和列于名臣

欽用材謀有異厥倫

師古曰倫類也言異其本類

述杜周傳第三十

博望杖節牧功大夏貳師秉鉞身豐胡社

李奇曰李廣利胡殺

之以其血塗社也師古曰豐者以血祭耳非塗也

致死爲福每生作阼

師古曰每貪也張騫致死封侯

李廣利求生而死也

述張騫李廣利傳第三十一

烏呼史遷

董月以刑

晉灼曰齊韓魯詩作薰薰師也從人得罪相坐之刑也師古曰晉說近是矣詩小雅兩無正之篇曰若此無罪

論胥以鋪胥相也鋪徧也言無罪之人橫相牽率徧得罪也韓詩論字作薰薰者謂相薰蒸亦漸及之義耳此叙言史遷因坐李陵

橫得幽而發憤廼思廼精錯綜羣言古今是經勒

成一家大略孔明師古曰孔甚也述司馬遷傳第三十二 孝

武六子昭齊亡嗣如淳曰昭帝及齊王無嗣也師古曰嗣合讀音祚燕刺謀逆廣

陵祝詛昌邑短命昏賀失據吳園不幸宣承天序

師古曰序合韻音似豫反述武五子傳第三十三 六世眈眈其欲

澈澈師古曰六謂武帝也易頤卦六四爻眈眈曰虎視眈眈其欲澈澈眈眈眈威視之貌也澈澈欲利之貌也眈音丁含反澈音滌今易滌

字作逐文武方作是庸四克晉灼曰方並也師古曰言並任文武之臣是用克開四方也助偃

淮南數子之德不忠其身善謀於國師古曰淮南謂淮南王安諫武帝不

宜興兵討越也述嚴朱丘主父徐嚴終王賈傳第三十四 東方

瞻辭談諧倡優師古曰談音恢譏苑扞偃正諫舉郵師古曰郵與尤

同尤懷肉汙毀弛張沈浮述東方朔傳第三十五 葛

繹內寵屈釐王子師古曰公孫賀妻衛皇后姊故云內寵也千秋時發宜春舊

仕張晏曰千秋訟衛太子冤發言敝義依霍庶幾云已如傳曰若此人

等無益於治可爲庶幾而已也師古曰敝揚敝義蔡義弘惟政事萬年容已咸睡厥

誨孰爲不子述公孫劉田楊王蔡陳鄭傳第三十六

王孫臚葬建廼斬將雲廷訐禹福逾刺鳳師古曰逾遠也是謂

狂狷敝近其衷師古曰衷中也論語稱孔子曰不得中行而與之必也狂狷乎此言朱雲以上蓋狂狷耳云敝

之操近於中行也東晉竹仲反述楊胡朱梅云傳第三十七 博陸堂

堂受遺武皇

師古曰論語稱孔子曰堂堂乎張也蓋美子張義形盛也故引之

擁毓孝昭

末命導揚

劉德曰武帝臨終之命也光能導達顯揚也

遭家不造立帝廢主

權定社稷配忠阿衡懷祿耽寵漸化不詳陰妻之

逆至子而亡

師古曰陰謂覆蔽之

秬侯狄拏虔恭忠信

師古曰甸奴休屠王

之子故曰狄拏稔音妬信合韻音新

弈世載德馳于子孫

師古曰馳延也音弋疏反

述霍光

金日磾傳第三十八

兵家之策惟在不戰營平

瞞立功立論

師古曰瞞瞞白髮顏也音浦河反

以不濟可上諭其信

師古

曰春秋左氏傳晏子對齊景公曰君所謂可而有不焉臣獻其不以成其可此叙言宣帝令擊西羌充國不從固上屯田之策也

武

賢父子武人之俊述趙充國平慶忌傳第三十九

義陽樓蘭長羅昆彌安遠日逐義成邳支陳湯

誕節救在三摠

鄭氏曰三摠謂劉向谷永耿育皆訟救湯也師古曰誕節言其放縱不拘也

會宗

勤事疆外之桀述傳常鄭甘陳段傳第四十 不

疑慮敏應寢當理

劉德曰膚美也敏疾也言於闕下卒變定方遂詐非衛太子也師古曰詩大雅文王

之篇曰躬士膚敏謂微子也故引以爲辭

辭霍不督逡遁致仕

師古曰遁讀與巡同 疏克有

終散金娛老定國之祚于其仁考廣德當宣近於

知恥

晉灼曰當宣帝時始仕至元帝時以歲惡民流便乞骸骨去此爲知恥師古曰此說非也當爲平當也宣王曰宣也言廣德平當

宜三人不苟於祿位並爲知恥也本傳贊曰薛廣德保懸車之榮平當逡巡有恥彭宣見險而止異乎苟患失之者矣

述舊

跡于薛平彭傳第四十一 四皓遜秦古之逸民不

營不拔嚴平鄭真

應劭曰爵祿不能營其志戚武不能屈其身也易曰不可榮以祿又曰確乎不可拔也

吉困于賀旦而不緇禹旣黃髮以德來仕

師古曰論語稱孔子

曰不曰白乎沮而不滯沮汙泥也可以滌皁繼黑也言天
性潔白者雖處汙沮之中其色不變也緇合韻音側佳

勝死善道郭欽蔣詡近遜之好應劭曰易曰好遜君子吉言遠暴亂之世好以和順舍惟正身

遜去不離其害也述王貞兩龍龔鮑傳第四十二 扶陽濟濟聞

詩聞礼亥成退讓仍作相師古曰仍頻也漢之宗廟叔孫是謨

革自孝元諸儒變度如淳曰造迭毀之義也師古曰謨謀也合韻音慕國之誕章

博載其路師古曰誕大也謂憲章之大者故廣載之述韋賢傳第四十三 高

平師師惟辟作威圖黜凶害天子是毗師古曰毗師法也師古曰

尚書洪範云惟辟作威言威權者唯人君得作之耳詩小雅節南山之篇曰尹氏太師惟周之氏秉國之鈞四方是維天子是毗言大臣

之職輔佐天子者也此叙言魏相欲崇君道而黜私權故引書詩以爲言也博陽不伐舍弘光大天

誘其衷慶流苗裔述魏相丙吉傳第四十四 占往知

來幽贊神明

師古曰易上繫辭曰神以知來知以藏往言著者對之德兼神知也說卦曰昔者聖人之作易也幽贊

於神明而生著言欲深致神明之道助以成教故爲著卜也

苟非其人道不虛行

師古曰下繫之

辭也言人能弘道非其人則不能傳

學微術昧或見仿佛疑殆匪闕違衆

迕世

師古曰論語稱孔子曰多聞闕疑慎言其餘則寡九多見闕殆慎行其餘則寡悔殆危也謂有疑則闕之也此叙言術士不闕

疑殆故遭禍難也

綫爲尤悔深作敦害

師古曰尤過也敦厚也

述眚兩夏侯

京翼李傳第四十五

廣漢尹京克聰克明延壽作

翊旣和且平矜能訐上俱陷極刑翁歸承風帝揚

厥聲

張晏曰受任爲右扶風卒宣帝下詔褒揚賜金百斤

敞亦平平文雅自贊

師古曰讀便便

辨也贊助也以文雅助治術也一說贊進也以文雅自進也

尊實赳赳邦家之彥

師古曰赳赳材

勁貌也音糾

章死非阜士民所歎述趙尹韓張兩王傳第四

十六 寬饒正色國之司直豐繫好剛輔亦慕直

師古曰繫是也音烏奚反

皆陷狂狷不典不式

師古曰典經也式法也

崇執言責

隆持官守

如淳曰崇爲尚書僕射是言責之官也哀帝及傳太后欲封從弟商崇諫不聽也晉灼曰隆諫武庫兵不宜以

給董賢家此爲持官守也

寶曲定陵竝有立志

鄧展曰孫寶曲撓定陵侯淳于長也晉灼何並斬侍

中王林卿奴是立志也

述蓋諸葛劉鄭母將孫何傳第四十七

師古曰本

傳母將隆在孫寶下今此叙云母將孫何是叙誤也

長倩悞悞覲霍不舉

蘇林曰悞悞行步安

舒也師古曰不肯露索而見霍光故不得大官也悞音弋於反

遇宣迺拔傳元作輔不圖不

慮見躓石許

師古曰詩小雅雨無正之篇云旻天疾威不慮不圖也慮思也圖謀也言幽王見天之威不思謀也此叙言

望之思謀不詳卒爲石顯及許史所顛躓也躓音竹二反

述蕭望之傳第四十八

子明

光光發迹西疆列於禦侮厥子亦良述馮奉世傳

第四十九

宣之四子淮陽聰敏

師古曰敏疾也合韻音美

舅氏蘧蔭

幾陷大理

師古曰蘧蔭口禾觀人顏色而爲辭倂者也言淮陽寃王舅張博爲詔辭幾陷王於大罪也蘧音渠蔭音除

幾音錦依反

楚孝惡疾東平失軌

師古曰惡疾謂害病也軌法則也

中山凶短

毋歸戎里

張晏曰戎氏女歸戎氏之里也

元之二王孫後大宗

孟康曰謂哀平帝

昭而不穆大命更登

鄧展曰昭而不穆有父無子張晏曰大命帝位也師古曰更音工衡反

述

宣元六王傳第五十

樂安褒褒古之文學

師古曰褒褒盛

類也音弋救反學合韻音下教反

民具爾瞻困于二司

師古曰詩小雅節南山之篇曰赫赫師尹民具

爾瞻言師尹之任位尊職重下所瞻望而乃爲不善乎深責之也此叙言匡衡失德不終相位故引以爲辭耳二司者司諫校尉王尊劾

奏衡追奏石顯揚著先帝任用傾覆之臣司諫校尉王駿劾奏衡專地盜土也司合韻音先寺反

安昌貨殖朱雲

作嫖

晉灼曰嫖醜也師古曰朱雲廷言欲斬張禹是爲醜惡之嫖音歌合韻音丘吏反

博山博慎受莽之

疾師古曰疾病也孔光後更曲意從莽之欲以病其德行也述臣張孔馬傳第五十一 樂昌

篤實不撓不詘遘閔既多是用廢黜師古曰詩郁柏舟曰遘閔既多受侮

不少遘遇也閔病也謂見病害甚衆也此叙言王商深爲王鳳所排陷也武陽躬勤輔導副君既

忠且謀饗茲舊勲高武守正因用濟身師古曰言傳喜不阿附傳太后

故得免禍述王商史丹傳喜傳第五十二 高陽文法揚鄉

武略政事之材道德唯薄位過厥任鮮終其祿師古曰鮮少也

音先博之翰音鼓妖先作劉德曰易曰翰音登于天貞凶上九處

賤反曰翰音博拜時聞有鼓聲也師古曰翰音登于天中孚卦上九爻辭也翰音高飛而且鳴喻居非其位聲過其實也述薛宣

朱博傳第五十三 烹陵修儒任刑養威用合時宜

器周世資義得其男如虎如狼進不跬步宗爲鯨

鯢

師古曰半步曰
跬音空索反

述翟方進傳第五十四

統微政缺災

眚屢發永陳厥咎戒在三七鄴指丁傳略窺占術述

谷永杜鄴傳第五十五 哀平之卹丁傳莽賢武嘉

戚之乃喪厥身高樂廢黜咸列貞臣述何武王嘉

師丹傳第五十六 淵哉若人實好斯文初擬相如

獻賦黃門輟而覃思草法纂立

師古曰輟止也纂與撰
同言止不復作賦草創

法言及撰
太玄經也

斟酌六經放易象論

師古曰放音甫
往反論論語也

以章厥身

師古曰
章明也述楊雄傳第五十七

獷獷亡秦滅

我聖文

師古曰獷獷麤惡之貌言
無親也獷音穢又九永反

漢存其業六學析分是

綜是理是綱是紀師徒彌散著其終始

師古曰散
謂分派也述儒

林傳第五十八

誰毀誰譽譽言其有

試師古曰論語稱孔子曰吾之於人誰

毀誰譽言如有所譽其有所試此叙言

人之從政可試而知故引以爲辭也

氓氓羣黎化成良吏師古曰黎

衆也言羣衆無知從

吏之化而成俗也 淑人君子時同功異沒世遺愛民有

餘思述循吏傳第五十九

上替下陵姦軌不勝猛

政橫作刑罰用興曾是強圉掊克爲雄

師古曰詩大雅蕩之篇曰曾是

強圉曾是掊克強圉強梁禦善也掊克好聚斂克

害人也言任用此人爲虐於下也掊音平侯反 報虐以威殃亦

凶終

師古曰尚書呂刑曰皇帝哀矜庶戮之不幸報虐以威言

述

酷吏傳第六十

四民食力罔有兼業大不淫侈

細不匱乏蓋均無貧遵王之法

師古曰論語稱孔子曰蓋均無貧言爲政平均不相陵奪

則無貧匱之人也故引之

靡法靡度民肆其詐

師古曰肆極也

偏上并下荒

殖其貨

師古曰
荒大也

侯服玉食敗俗傷化

張晏曰玉
食珍食也

述貨殖

傳第六十一

開國承家有法有制家不臧甲國不

專殺

師古曰殺合
韻音所例反

矧乃齊民作威作惠

師古曰矧況也齊
人齊等之人也

如台不匡禮法是謂

如傳曰台我也我國家也
師古曰匡正也台音怡

述游俠傳

第六十二

彼何人斯竊此富貴營損高明作戒後

世

師古曰詩小雅巧言之篇刺讒人也其詩曰彼何人斯居河之麋
賤而惡之也此叙亦深疾倭幸之人故引詩文以譏之營惑也

述

倭幸傳第六十三

於惟帝典戎夷猾夏

師古曰於歎
辭也帝典虞

書舜典也載舜命咎繇作士戒之曰蠻
夷猾夏猾亂也夏諸夏也於讀曰烏

周宣攘之亦列風雅

師古曰
攘卻也

宗幽既昏淫于褒女

師古曰宗幽幽
王居宗周也

戎敗我驪遂

亡豐鄣

張晏曰申侯與戎共伐周敗於驪
山下遂殺幽王平王東徙都成周

大漢初定匈奴強

盛圍我平城寇侵邊境

師古曰境合韻音竟

至于孝武爰赫斯

怒王師雷起霆擊朔野

師古曰霆疾雷也音廷

宣承其末廼施

洪德震我威靈五世來服

師古曰自宣至平凡五帝

王莽竊命是

傾是覆備其變理爲世典式述匈奴傳第六十四

西南外夷種別域殊南越尉佗自王番禺攸攸外

寓閩越東甌

師古曰攸攸遠貌

爰泊朝鮮燕之外區漢興柔

遠與爾剖符

師古曰柔安也剖符謂封之也

皆恃其坦乍臣乍驕孝

武行師誅滅海隅述西南夷兩越朝鮮傳第六十五

西戎即序夏后是表

張晏曰表外也禹就叙以爲外國也師古曰此說非也表明也明以德化也

周穆觀兵荒服不旅

張晏曰觀示也旅陳也犬戎終王而周穆王不享征之是以荒服不陳於廷也

既興扇而不終師古曰扇熾也鉤弋憂傷孝昭以登上官幼尊

類禡厥宗應劭曰詩云是類是禡禮將征伐告天而祭謂之類告以事類也至所征伐之地表而祭之謂之禡禡者馬也馬者

兵之首故祭其先神也言上官后雖幼尊貴史娣王悼身遇不

祥及宣饗國二族後光恭哀產元天而不遂邛成

乘序履尊三世張晏曰至成帝乃崩也師古飛燕之妖禍

成厥妹丁傳僭恣自求凶害中山無辜乃喪馮衛

師古曰馮昭儀中山孝王母也爲傳氏所陷衛姬中山孝王后也爲王莽所滅惠張景薄武陳宣霍

成許哀傳平王之作人事歌羨非天所度師古曰作起也度居

也言惠帝至平帝王皇后七人時雖處尊位人心羨慕以非天意所居故終用不昌也度音徒各反怨容若茲如

何不恪師古曰恪敬也述外戚傳第六十七 元后娠母月精

見表

師古曰
娠音身

遭成之逸政自諸舅

師古曰言成帝貪自
逸樂而委政於王氏

陽平作威誅加卿宰

師古曰謂王
商及王章也

成都煌煌假我明

光

師古曰煌
煌熾貌

曲陽歌歌亦朱其堂

師古曰歌歌氣
盛也音許驕反

新都亢

極作亂以亡述元后傳第六十八

咨爾賊臣篡漢

滔天行驕夏癸虐列商辛

張晏曰桀名
癸紂名辛

偽稽黃虞纘

稱典文

師古曰
稽考也

衆怨心神怒惡復誅臻

張晏曰復周也臻至
也十二歲歲星一復

莽稱帝十三歲而見誅也左氏傳曰
美惡周必復師古曰復音扶目反

百王之極究其姦昏述

王莽傳第六十九

凡漢書叙帝皇

張晏曰十
二紀也

列官司

建侯王

張晏曰百官表
及諸侯王表也

準天地統陰陽

張晏曰準天地天文志
也統合也陰陽五行志也

闡元極步三光

張晏曰闡大也元始也極至也三光日月星也
大推上極元始以來及星辰度數謂律曆志

分州

域物土疆

張晏曰地理及溝洫志也

窮人理該萬方

張晏曰人理古今人表萬方謂郊祀志有日月

星辰天下山川人鬼之神

緯六經綴道綱

張晏曰藝文志也

總百氏贊篇章

古師

曰贊明也

函雅故通古今

張晏曰包含雅訓之故及古今之語

正文字惟學林

古師

曰信惟文學之林藪也凡此總說帝紀表志列傳備有天地鬼神人事政治道德術藝文章汎而言之盡在漢書耳亦不皆如張氏所說也

述叙傳第七十

漢書列傳卷第七十

班固前漢書凡百篇總一百二十卷

十二帝紀一十三卷

八表一十卷

十志一十八卷

七十列傳七十九卷



景祐元年九月秘書丞余靖上言國子監所印兩
漢書文字舛譌恐誤後學臣謹叅括衆本旁据它
書列而辨之望行刊正

詔送翰林學士張觀等詳定聞奏又命國子監直
講王洙與靖偕赴崇文院讎對二年三月靖又上
言案顏師古叙例云班固漢書舊無注解唯服虔
應劭等各著音義自名其家至西晉晉灼集爲一
部凡十四卷又頗以意增益時辨二學當否號曰
漢書集注永嘉之亂此書不至江左有臣瓚者莫
知氏族考其時代亦在晉初又摠集諸家音義稍

以己見續廁其末掎摭前說多引汲冢竹書凡二十四卷分爲兩帙凡稱集解音義即其書也蔡謨全取此書散入衆篇自是以來始有注本至唐太宗時皇太子承乾命顏師古更加刊整刪繁補略裁以己說儒者伏其詳博遂成一家摠先儒注解名姓可見者二十有五人而爵里年代史闕載者殆半考其附著及舊說所承注釋源流名爵年次謹條件以聞望德刻于本書之末庶令學者啓卷具知奏可今列之如左

荀悅字豫穎川人後漢祕書監

撰漢紀三十卷其事比出漢書後人取悅所書入於注本

服虔字子慎滎陽人後漢尚書侍郎高平令九

江太守

初名重改名
抵後定名虔

應劭字仲瑗

一作仲瑗
又作仲遠

汝南南頓人後漢蕭令御

史營令泰山太守

伏儼字景宏琅邪人

劉德北海人

鄭氏舊傳晉灼集注云北海人不知其名而臣
瓚以爲鄭德今書但稱鄭氏

李斐不詳所居郡縣

李奇南陽人

鄧展南陽人魏建安中爲奮威將軍封高樂鄉侯
文穎字叔良南陽人後漢末荊州從事魏建安
中爲甘陵府丞

張揖字稚讓清河人

一云河間人

魏太和中爲博士

止解司馬相如傳一卷

蘇林字孝友

一云慶

陳留外黃人魏給事中領秘書

監散騎常侍永安衛尉太中大夫黃初中

遷博士封安成侯

張晏字子博中山人

如淳馮翊人魏陳郡丞

孟康字公休安平廣宗人魏散騎侍郎兵農太

守領典農校尉勃海太守給事中散騎常侍
中書令後轉爲監封廣陵亭侯

璜昭不詳何郡縣人

韋昭字洪嗣吳郡雲陽人爲吳尚書郎太史令
中書郎博士祭酒中書僕射封高陵亭侯

晉灼河南人晉尚書郎

劉寶字道字高平人晉吏部侍郎

臣璜不知何姓案裴駟史記序云莫知氏姓韋
稜續訓又言未詳而劉孝標類苑以爲干璜
鄭元注水經以爲薛璜姚察訓纂云案庾翼

集于瓚爲翼主簿兵曹叅軍後爲建威將軍
晉中興書云翼病卒而大將于瓚等作亂翼
長史江彬誅之于瓚乃是翼將不載有注解
漢書然瓚所采衆家音義目服虔孟康以外
並因晉亂湮滅不傳江左而高紀中瓚案茂
陵書文紀中案漢祿秩令此二書亦復亡失
不得過江明此瓚是晉中朝人未喪亂之前
故得具其先輩音義及茂陵書漢令等耳蔡
謨之江左以瓚二十四卷散入漢書今之注
也若謂爲于瓚乃是東晉人年代前後了不

相會此瓚非干足可知矣又案穆天子傳曰
錄亡秘書校書郎中傅瓚校古文穆天子傳
已記穆天子傳者汲縣人不準盜發古塚所
得書今漢書音義臣瓚所案多引汲書以駁
衆家訓義此瓚疑是傅瓚瓚時職典校書故
稱臣也顏師古曰後人斟酌瓚姓附之傅族
耳旣無明文足取信

郭璞字景純河東人晉贈洪農太守

止注相
如傳

蔡謨字道明陳留考城人東晉侍中五兵尚書太
常領祕書監都督徐兗青三州諸軍事領徐

州刺史左光祿大夫開府儀同三司領揚州
牧侍中司徒不拜贈侍中司空謚文穆公

崔浩字伯淵清河人後魏侍中特進撫軍大將

軍左光祿大夫司徒東郡公

撰荀悅漢
紀音義

顏籀字師古雍州萬年人唐中書侍郎兼通直
散騎常侍祕書監洪文館學士封琅邪縣子

二年九月校書畢凡增七百四十一字損二百一十二
字改正一千三百三字

右宋景文公以諸本參校手所是正並附古注之末
至正癸丑三月十二日雪林倪瓚在疑香閣謹院





此北宋精刊景祐本漢書爲余百宋一璽
中史部之冠藏篋中三十來年矣非至
好不輕示人郡中 尊齋都轉偶過小
齋曾一出示繼於朋好中時一及之奈
余惜書癖深未忍輕棄并不敢以議
價致蔑視寶物因思 都轉崇儒重
道昔年出資數萬敬脩
文廟其誠執事為何如知天必昌大
其後以振家聲故近日收藏古

藉嗜好之篤訪求之勤一至于此則
余又何敢自秘所藏獨寶其實耶
君家當必有能讀是書者敢以鎮
庫之物輟贈爲預兆云

乙亥季冬

士礼居主人識





顏注班書行世諸刻大約源於南宋嘉本又句或用三劉
宋子京之說或校刊者用意添改往往致誤而刪字尤
多此以後人文理讀前人書之病也惟是刻乃景祐乙
年監本獨存北宋時面目惜補版及剜換處無從取
正然據是以求其添改之跡誠今日考世實定也後之
讀者幸初而路者之嘉慶戊午用校時本一過於讀未
見書齋其所取正文多別記首不端同黃刻處片





跋

此爲百宋一廛中史部之冠今藏瞿氏鐵琴銅劍樓錢曉徵黃蕘圃顧千里均定爲北宋景祐刊本原闕溝洫藝文二志配以大德覆本又殘損漫漶者十餘葉亦以元刻補配是本之勝瞿氏藏書目錄紀述綦詳茲可不贅卷中原有明人周迂叟朱墨校語蠅頭細楷不可縮印且所錄爲宋劉之問刊本（王鳴盛十七史商榷吳騫愚谷文存楊紹和楹書隅錄均作之同瞿氏書目作之同惟王先謙漢書補注作之問嘉靖南監本同但字稍模胡余見初印宋本實作之問）宋祁校語今武英殿本悉已采入人盡獲見故悉芟削昔全謝山錢警石均於宋祁校語

有所不滿謝山至斥爲南渡末年麻沙坊中不
學之徒依托爲之所舉五疑言之成理後人依
托事或可信然竟謂所引南本浙本越本邵本
信口捏造則未免過甚其詞按武英殿本齊召
南跋凡監本脫漏並据慶元舊本補缺訂譌又
卷一上考證謂監本脫宋祁一段今從宋本凡
三劉刊誤宋祁朱子文諸說別以一圈脫者俱
補是則殿本所采悉出之問刊本無疑綜計所
引有淳化本景德本景本監本學官本學本史
館本江南本江本南本南浙本江浙本兩浙本
浙本吳越舊本越本建本邵本唐本韋本趙本
晏本王本楊本謝本郭本姚本李本別本舊本
古本新本並景祐本或同名異稱或渾言泛指

實亦不過二十餘種景祐元年余靖上言已有
參括衆本之語崇文總目亦云宋祁余靖等讐
對三史悉取三館諸本以相參校此二十餘種
者安知不卽在所謂衆本諸本之中卽有非宋
祁及見之本而景祐刊成至之問刻跋之慶元
嗣歲中更百六十載當時剗剗盛行班史人所
必讀公私各家安知無好事之徒私淑宋說參
以己見競爲流通災及梨棗遂致精麤美惡並
行於一時也是本爲宋祁余靖諸人校定增損
改正凡若干字俱有紀錄至極精審核之宋祁
校語與相印合者凡四百九十餘條則其所引
之本亦必各有由來慎選精擇而非無知妄作
者之所能爲高郵王念孫精於讎勘之學其校

漢書往往引宋祁校語以糾正時本翟氏目錄
所舉二條外如武紀征和三年丞相屈釐下獄
要斬妻子梟首是本無子字與所謂舊本合元
紀永光元年賜吏六百石以上爵五大夫勤事
吏二級爲父後者民一級是本無爲父後者四
字與所謂越本合禮樂志四時舞者孝文所作
以明示天下之安和也是本無明字與所謂邵
本合郊祀志上以牡荆畫幡日月北斗登龍以
象大一三星爲泰一鑾旗是本無旗字與所謂
越本新本合又作二十五弦及空侯瑟自此起
是本空作坎與所謂邵本合又遂至東萊東萊
宿留之是本不疊東萊二字與所謂淳化本合
地理志上桂陽郡桂陽匯水南至四會入鬱林

是本無林字與所謂景本合王陵傳平日各有
主者是本無各字酈商傳得丞相守相大將軍
各一人小將軍二人是本無二軍字周昌傳於
是苛昌自卒史從沛公是本自作以皆與所謂
越本合任敖傳蒼尤好書無所不觀無所不通
而尤邃律歷是本尤好作凡好與所謂學官本
合申屠嘉傳其見寵如是是本無見字與所謂
越本合鼂錯傳前擊後解與金鼓之音相失是
本音作指與所謂學官本越本合鄭當時傳客
至亡貴賤亡留門下者是本無下字與所謂邵
本合枚乘傳此愚臣之所以爲大王惑也是本
無以爲王三字與所謂景德本合又上書北闕
自陳枚乘之子得上得之大喜是本無之字霍去

病傳元狩三年春爲票騎將軍是本三年作二
年皆與所謂越本合公孫敖附傳以將軍出北
地後票騎失期是本無失字與所謂景德本合
司馬相如傳子虛賦其山則盤紆峩鬱隆崇律
崑是本無隆崇律崑四字又諭告巴蜀民檄今
奉幣使至南夷是本使作役司馬遷傳及如左
邱明無目孫子斷足是本無明字武五子燕刺
王旦傳是時天雨虹下屬宮中飲井水井水泉
竭是本無泉字嚴助傳留軍屯守空地曠日持
久是本持作引皆與所謂越本合匡衡傳賢者
在位能者在職是本在職作布職與所謂越本
別本合孔光傳故霸還長安子福名數於魯奉
夫子祀是本無安字與所謂浙本合南粵傳大

后怒鏹嘉以矛是本鏹上有欲字與所謂別本合敘傳下後昆承平亦有紹土是本作亦猶有紹與所謂監本浙本越本合此皆時本誤而景祐本不誤宋祁所舉各本亦不誤者其他訛文脫字衍文俗字爲景祐本所不免且賴所舉各本以是正者亦尙不尠經王氏之甄錄而原有之價值益明平心論之之問鐫刻之時既見景祐本而又見同時通行之本意在集取衆長襲謬沿訛遂亦並至所舉各本今無一存而猶得考見一二爲讀班史者之助且以補景祐本之不及不可謂非之問功也余夙爲之問不平因校是本而爲之辨護如右海鹽張元濟